


# ANG PRESENSIYA SA DIOS

## NGA WALA MAILA

 Karon samtang gamay pa ang atong mga mananambong, paningkamotan nato nga—nga dalion kini, para sa paggawas nato mahimo nato, matuman nato kining usa ka katuyoan, nga maila ninyo ang Presensiya ni Jesus Cristo. Kita n’yo? Kung ania karon Siya, kung ingon-ana, aba, mamahimong hapsay na ang tanang butang. Siya mismo ang nagbuhat sa Pulong. Ania Siya aron pamatud-an Kini. Ginapamatud-an Niya nga Iyang pamatud-an Kini. “Siya mao ra sa gihapon kagahapon, karon, ug hangtud sa kahangturan.” Nakita nato nga ginabuhat Niya kini kagabii, nga walay pagkasayup; nakita gyud nato Siya, sa matag gabii, ug sa matag adlaw, ug sa matag tuig. Wala ni usa ka higayon nga aduna Siya’y giprediktar, bisan pa man kung kanus-a kini, kung kanus-a kini mahitabo, sa linibo ka mga higayon, kondili hingpit gayud nga nahanabo ngadto sa pinakadetalye niini, sa gikatak dang oras, ug sa pagka-eksakto mismo. Giunsa man nga ingon niana? Pila ba ang nasayod niana, ug nasayod sa ministerio, ug nahibalo nga matuod gyud kini? [Nagaingon ang kongregasyon, “Amen.”—Ed.] Mao na kana. Wala ni usa ka higayon, bisan, unsa pa ka imposible, nagakahitabo gyud sa gihapon. Dios Siya! Ug kung maila lamang nato kana, manggunit lang gyud niana!

<sup>2</sup> Ug karon aduna lamang kami og mubo kaayong panahon nga makaduaw dinhi. Siguro mga tulo na lang ka gabii, o duha na lang ka gabii ug usa ka adlaw, pagkahuman karong gabii. Siguro sa Dominggo sa hapon mao na ang pagtapos nga panerbisyo. Paningkamotan nato nga matapos sa Dominggo sa hapon para ang mga pastor ug ang tanan. . . Dili pud namo gusto nga kamo dili makatambong sa inyong simbahan. Gusto lamang namo nga makahatag og dugang ngadto sa iglesia, ug makahatag og dugang nga pagtoo diha sa Dios nga inyong gialagaran sa inyong simbahan. Kita n’yo? Ug dili namo gusto nga saradohan na lang ang mga pultahan sa simbahan, sa unsa mang paagi. Gusto namo nga magpabilin kamo dinha, pero ania naningkamot gyud kami nga matabangan kamo, nga mapadasig pa kamo og ayo. Ang rebaybal dili man nagapasabot nga magdugang og mga mananambong sa iglesia; ang buot ipasabot sa rebaybal maoy padasigon balik kung unsa ang anaa na kanimo daan; husto kana, usa ka rebaybal.

<sup>3</sup> Nagtan-aw ko usa ka higayon didto sa baybayon, kon diin nagahaguros ang hangin, ug grabe gyud ang paghampas. Aba, dili diay kadto sa baybayon, didto diay kadto sa—sa

Lake Michigan. Nagatindog ako didto og ginalantaw kadtong mga balod samtang nagapaduol sila, ug—ug, oh, nanaglukso-lukso ang dagat, o nanaglukso-lukso ang tubig, ug—ug ang mga sakayan nagapasaka-paubos. Ug nahunahuna ko, “Unsa ma’y nagakahatabo?” Nahunahuna ko, “Aba, nagakaaduna diay og rebaybal ang lanaw.” Mao kana. Nagalukso-lukso kini ug nagakilingkiling, ngano man? Adunay makusog nga haguros sa hangin ang nagatutud niini. Nahunahuna ko, “Bueno, kabalo ba mo? Wala gyu’y ni usa ka tulo sa tubig ang gidugang niini sama ra sa kung unsa kini sa diha nga hilom pa ug wala pa kini nagalihok.” Wala gyu’y gidugang ni usa ka tulo nga tubig; gipalihok lang gyud ang tubig. Bueno, karon, unsa ma’y nagpahinungdan sa paglihok niini? Kabalo ba mo kung unsay resulta kung palihokon ang tubig? Ginapang-anod niini ang tanang basura palayo, padulong sa baybayon.

<sup>4</sup> Mao kana ang gikinahanglan nato, ang anoron palayo ang tanang kawalay-pagtoo, padulong sa baybayon. Tugotan ang Pulong sa Dios nga magpatigbabaw sa tanan. Mao kana ang gikinahanglan nato, usa ka rebaybal, ug anoron ang tanan nga kawalay-pagtoo palayo, ug tanan nga pagkasalawayon ug mga too-too, ug ingon nianang mga butang. Moadto ug tan-awon kon ang Dios ba Dios sa gihapon. Mao kana kon nganong nagapahigayon kita og mga rebaybal.

<sup>5</sup> Tabangan unta kita sa Ginoo samtang ginapili nato kining teksto ug basahon kini karong gabhiona. Panalanginan unta sa Dios ang pagbasa sa Iyang Pulong, nga makita sa San Mateo, sa—sa ika-12 nga kapitulo, ika-38 ug hangtud sa ika-42 nga bersekulo.

<sup>6</sup> Ug ang akong teksto karong gabhiona mao’y: *Ang Presensiya Sa Dios Nga Wala Maila*. Kagabii gihisgotan nato ang mahitungod kang Jesus ingon nga mao sa gihapon kagahapon, karon, ug hangtud sa kahangturan, ug nakita mismo nga Siya mao sa gihapon kagahapon, karon, ug hangtud sa kahangturan. Karon ang Iyang Presensiya, kung Siya mao ra sa gihapon, wala Kini maila. Basahon nato.

*Unya mingtubag kaniya ang uban sa mga escriba ug sa mga Fariseo, sa pag-ingon, Magtutudlo, buot unta kami motan-aw og usa ka ilhanan gikan kanimo.*

*Apan siya mitubag ug miingon kanila, Usa ka kaliwatan nga dautan ug mananapaw nangita og ilhanan; ug walay laing ilhanan nga igahatag ngadto niini, kondili ang ilhanan ni Jonas ang propeta:*

*Kay ingon nga si Jonas didto sa tiyan sa dakung isda sa tulo ka adlaw ug tulo ka gabii; maingon man usab ang Anak sa tawo magapabilin sa kahiladman sa yuta tulo ka adlaw ug tulo ka gabii.*

*Ang mga tawo sa Ninive motindog sa adlaw sa paghukom kauban niini nga kaliwatan, ug managhukom niini sa silot: kay nanaghinulsol sila tungod sa pagwali ni Jonas; ug, ania karon, adunay usa dinhi nga labaw pa kay kang Jonas.*

*Ug ang reyna sa habagatan motindog sa adlaw sa paghukom kauban niini nga kaliwatan, ug magahukom niini sa silot: kay siya gikan sa mga kinatumyan sa yuta aron sa pagpatalinghug sa kaalam ni Solomon; ug, ania karon, adunay usa nga labaw pa kay kang Solomon nga ania karon dinhi.*

7 Ang wala maila nga Presensiya! Unsa kaha'y nahunahuna sa mga tawo niadto? Ang Dios sa kanunay, kanunay'ng ingon na niana sa matag higayon nga nagaabot Siya. Sa dihang ania si Jesus sa unang higayon, miingon Siya, "Inyong—inyong ginapaputi ug ginadayandayanan ang mga pader ug mga lubnganan sa mga propeta, ug samtang kamo man ang nagbutang kanila didto." Kita n'yo, adunay butang nga nagakahitabo, ug napalabay lang kadto. "Ug ginatago kini sa Dios ngadto sa mga mata sa makinaadmanon ug mga masinabuton, ug ginapadayag kini ngadto sa gagmay'ng mga bata nga buot makakat-on." Gipasalamatan ni Jesus ang Amahan nga ginabuhat ang ingon niana. Kita n'yo? Nagaagi lang kini sa mga tawo ug wala nila mahibalo-i kini.

8 Pananglitan, kamong mga Katoliko nga ania karong gabhiona, nadumduman ba ninyo pila na ka mga tuig ang milabay, si Joan of Arc, sa Pransya, kadtong gamay'ng gining nga kaniadto. . . Gipamunoan niya kadtong rebolusyon didto sa Pransya, pero siya usa—usa gayud ka alagad ni Cristo. Unsa ang gibuhat sa inyong simbahan ngadto kaniya? Gisunog siya sa usa ka poste, ingon nga balbal, tungod kay nakakita man siya og mga panan-awon ug siya'y espirtual. Gisunog siya sa Iglesiang Katoliko, ingon nga usa ka balbal, didto sa poste, tungod kay siya'y espirtual ug nakakita og mga panan-awon. Pipila ka tuig lang human niadto, hingkaplagan nila nga ang maong babaye diay usa ka balaan. Busa siyemre nagbuhat kamo og dakung pagpenitensya, gikalut ninyo kadtong mga patay'ng lawas niadtong mga pari nga nagkondena sa iya ug nagsunog kaniya, ug gipanglabay sila ngadto sa suba. Siyempre, nga, nagbuhat kamo og dakung pagpenitensya alang niadto, sa pagkalut sa mga patay'ng lawas niadtong mga pari.

9 Karon, sa mga panahon kaniadto sa mga propeta, unsa man ang nahitabo? Gibuhat nila ang mao rang butang. Wala nila sila giila hangtud nga namatay na lang ang maong mga propeta, nahuman na lang ang ilang ministeryo, naipagawas ang mga Pinili, ug human nga wala na sila ayha pa naila sa maong mga tawo nga adunay propeta diay sa ilang taliwala kaniadto.

<sup>10</sup> Si Jesus, mianhi Siya sa yuta. Mipuyo sulod Kaniya ang Amahang Dios. “Ako ug ang Akong Amahan usa ra. Ang Akong Amahan nagpuyo Kanako. Dili kini Ako ang nagabuhat sa maong mga buhat, kondili ang Akong Amahan. Ug kung wala Ko ginabuhat ang mga buhat sa Akong Amahan, ayaw Ako toohi.” Karon, kung namatikdan ninyo sa dihang mianhi Siya, mga anaa halos usa—usa ra sa nubenta sa kalibutan ang nahibalo nga Siya ania diay sa yuta niadtong panahona, ug bisan pa niana Siya’y Manluluwas sa kalibutan. Ug nahanabo gyud nga wala maila nila kung Kinsa Siya, bisan kadtong iglesia o wala gayud, halos, hangtud nga gilansang nila Siya, gilubong, ug mingbangon sa ikatulo nga adlaw, nga wala gihapon nila naila kung Kinsa gyud Siya.

<sup>11</sup> Nagaabot kini ug nagabiya, ug dili gyud maila sa mga tawo hangtud nga milabay na lang kini, ug, sila, tungod kay dili man kini mohaum sa ilang teolohiya, dili man kini moangay sa ilang panahon. Kita n’yo, ang nagakahatabo man gud, nagakinabuhi gihapon sila diha sa sulaw sa ubang kapanahonan, kanunay.

<sup>12</sup> Ang hinungdan kung nganong wala nila dawata si Jesus, tungod kay nagakinabuhi man sila kaniadto sa sulaw sa Balaod. Ug sa dihang miabot si Jesus, dili man nga supakon ang Balaod, kondili miabot para tumanon ang Balaod, bueno, dili nila madawat Siya tungod kay ang Iyang Mensahe dili man eksakto sa pagka-kredo nila niini, ug ang tawag niadto mga tradisyon. Ug wala Siya miabot nga subay sa ilang mga tradisyon. Wala Niya gisunod ang ilang mga tradisyon. Ug sa tinuod Iyang giguba kini, ug gibungkag, ug—ug gipangbuhat ang mga butang nga supak sa niini, mao nga gihunahuna nila nga ginaguba Niya ang mga iglesia. Ug dili gyud nila Siya madawat tungod sa Iyang Mensahe. Ug nahibaloan nato karon nga miabot Siya kaniadto nga eksakto ang pagkalinya sa propesiya sa Dios, pero wala nila kadto mahibalo-i niadtong panahona.

<sup>13</sup> Ug mahimong mahanabo kini pag-usab, ug dili man lang nato mahibaloan. Gihunahuna nako unsa kaha kung aktuwal Siyang magpakita karong gabhiona, mamahimong supak kaayo kini sa tanang mga gidrowing nato diha sa atong mga pisara, ug sa atong mga tulonghaan ug sa mga ingon nianang butang. Gamay ra gyud ang makahibalo kung unsa na ang nagakahitabo. Gisulti Niya nga mamahimong ingon niana, ang pamaagi sa Iyang pag-abot.

<sup>14</sup> Karon, si Jesus niadtong panahon bisan pa nga Makasulatanong gipaila pinaagi sa mga Kasulatan, ug ang mga Escriba ug mga Fariseo sa maong panahon dili gihapon makaila Kaniya. Nganong dili man nila, nganong dili man nila maila? Tungod kay lahi man ang pagkasabot nila niini. Mao nga dinha sila gisulthian ni Jesus, “Susiha ninyo ang Kasulatan, diha kanila naghunahuna man kamo nga makabaton kamo og Kinabuhing Walay Katapusan, ug kini sila mao ang

nagapanghimatuod Kanako.” Kita n’yo? Karon miabot Siya nga tukma gayud sa mga Kasulatan. Pero ila kining gihunahuna nga tingali pagmoabot Siya, mahimo nga buhaton sa Mesias kung unsa ang gibuhat kaniadto ni Moises, o kung unsa ang gibuhat ni Noe, nga magtukod og usa ka arka o unsa man nga, uban pa. Pero, ang hinungdan nga miabot Siya sa paagi sa Iyang pag-abot kaniadto, wala man nila kini nahunahuna; diha sa mga Kasulatan tungod sa ilang mga tradisyon, wala nila kini natudlo; busa ang mga tawo nangalibog nga dili nila hinoon nahibaloan kung unsa na ang nagakahitabo.

<sup>15</sup> Nahunahuna nako nga unsa kaha kung mahanabo kana karon? Nahunahuna nako nga unsa kaha kung lahi kini sa atong mga tradisyon nga gikatudlo kanato? Ug mahimo kining moabot, ug moagi na lang ug wala nato nahibaloan hangtud nga nakalabay na kini, ug dayon tapos na. Sa ingon nianang paagi gyud kini moabot.

<sup>16</sup> Kabalo ba mo, niadtong miabot si Juan Bautista sa eksena, nga gitagna na kaniadto pa diha sa Basahon sa Isaias, mga gatusan na ka tuig? Mga walo ka gatus ka mga tuig, niadtong gipropesiya siya ni Isaias, sa hunahuna ko, sa wala pa ang pag-abot ni Cristo. Kabalo ba mo nga si Juan miabot nga eksakto gayud sa pagkasulti ni Isaias nga siya moabot, miabot siya nga eksakto gayud sa pagkasulti ni Malaquias nga siya moabot, ug bisan kadtong mga apostoles wala makaila niini? Usa niana ka adlaw, diha sa Mateo 11, atua sa bilanggoan si Juan; ug ang mga apostoles, pipila sa iyang mga tinun-an ang miduol para pangutan-on si Jesus kung Siya na ba gayud ang Mesias, o—o kinahanglan pa nila nga maghulat sa usa pa.

<sup>17</sup> Karon matikdi, wala si Jesus naghatag kanila og usa ka basahon kung unsaon ni Juan pagminatarung, kung unsaon niya pagminatarung sulod sa bilanggoan, o kung unsa ba’y angay niyang igawi. Ang gisulti Niya, “Magpabilin kamo ug bantayan kung unsa’y mahanabo, ug lakaw mo’g balik para ipakita kang Juan ang mga butang nga inyong nakitang nangahanabo.” Mao kadto ang kapanghimatuoran nga . . . Siya mismo kadtong Pulong.

<sup>18</sup> Ug karon hinumdumi, ang Pulong kanunay’ng nagaabot ngadto sa usa ka propeta. Kabalo kitang tanan niana. Dili magabuhat ang Dios og bisan unsa man gawas lamang nga ipakita una kini ngadto sa Iyang mga propeta. Mao kana ang hinungdan kung ngano ang Basahon sa Kapadayagan ni Jesus Cristo mao ang tibuok kahupnganan ni Cristo nga gipahimutang mismo dinhi sa atong atubangan, ang Basahon. Karon kinahanglan Niyang magpadala og usa, usa ka tawo nga magpamatuod sa nianang Basahon, nga magpadayag Niini, mag-abli sa mga Selyo, ug uban pa. Pero kung paghisgotan ang dugang pa nga kapadayagan ni Cristo, maila na kini mismo Dinhi. Siya ang kahupnganan Niini, sa Kapadayagan. Karon

matikdi, wala gayud kini nagakapakyas, kondili ang Pulong nagaabot ngadto sa propeta.

<sup>19</sup> Tan-awa si Juan nga nagatindog didto sa tubig, nga nagapropesiya, ang maong propeta, nga ang Mesias anaa mismo sa taliwala kanila. Miingon siya, “Anaa’y Usa nga nagatindog kauban ninyo karon, nga wala ninyo hingbaloan; Pagabautismohan Niya kamo pinaagi sa Espiritu Santo ug Kalayo.” Karon hinumdumi, atua si Jesus nagatindog uban mismo kanila, maoy ingon sa Biblia, ug wala nila Siya maila. Usa niana ka adlaw sa dihang milusong si Jesus sa pagduol, Nailhan Siya ni Juan, ug miingon siya, “Tan-awa ang Cordero sa Dios nga magakuha sa sala sa kalibutan.” Karon matikdi, sa wala pa Siya maila ni kinsa man, miabot Siya ngadto sa propeta. Siya ang Pulong. Si Juan ang propeta.

<sup>20</sup> Nahinumduman ko ang akong tigulang nga Baptist nga magtutudlo kaniadto nga giingon niya kanako, miingon, “Kabalo ka ba kung unsa ang nahitabo kaniadto?” Miingon pa, “Si Jesus ang nagbautismo kang Juan.”

Ingon ko, “Sa tan-aw ko dili oy.”

<sup>21</sup> Miingon siya, “Sigurado, wala pa man gud nabautismohan si Juan kaniadto; miabot siya nga nagawali, nagapangbautismo, walay si bisan kinsa kaniadto ang takus nga magbautismo kaniya. Mao nga si Jesus ang nagbautismo kaniya.”

Ingon ko, “Wala ko kabalo.”

<sup>22</sup> Ug usa niana ka adlaw sa pagtuon ko niini, gipadayag kini sa Balaang Espiritu, kita n’yo. Bantayi, milusong Siya sa tubig; miingon kadtong propeta, “Nganong Ikaw na hinoon ang mianhi kanako? Ako ang nagkinahanglan nga pagabautismohan Nimo.” Miingon si Jesus, “Itugot lang kini karon,” bantayi, “apan mao kini aron atong (angay kanato) tumanon ang tibuk pagkamatarung.” Si Juan, ingon nga usa ka propeta, nahibaloan niya ang Pulong! Siya nga Halad, kinahanglan mahugasan sa dili pa maihalad; dayon gibautismohan Siya, gibautismohan Siya ni Juan, tungod kay, “Kini aron atong matuman ang tibuk pagkamatarung.” Miabot ang Pulong ngadto sa propeta, didto sa tubig.

<sup>23</sup> Ug pagkahuman niadtong mabautismohan na Siya, ang mga tawo sa gihapon. . . Ug ang Balaang Espiritu mikunsad, wala Kini makita sa tanan. Nakita Kini ni Juan.

<sup>24</sup> Ang Manulonda sa Ginoo mahimong ania mismo karong gabhiona, ug tingali nakita Kini sa usa ka tawo, ug wala na’y uban pa.

<sup>25</sup> Kadtong Kahayag, kadtong Bitoon nga miagi mismo sa ibabaw sa matag obserbatoryo kaniadto, nga—nga gisundan sa maalamon nga mga lalaki; ni usa ka obserbatoryo wala man lang nakabantay niadto, wala na’y uban pa ang nakakita Niadto,

wala gayud, gawas lang niadtong maalamon nga mga lalaki, tungod kay sila ra man ang puedeng makakita Niadto. Nakita nila Kadto. Tinuod gyud Kadto para kanila.

<sup>26</sup> Sa dihang ang Kahayag, ang Haliging Kalayo, mihampak kang Pablo, didto sa dalan padulong sa Damascus, naila niya nga anaa siya sa Presensiya sa Dios. Karon, kining Hebreohanon dili gyud motawag ngadto sa uban pa nga espiritu, “Ginoo,” gawas lang kung nahibaloan niya nga Kini ang mao rang Haliging Kalayo nga mao’y nanguna kaniadto sa iyang katawhan didto sa kamingawan. Ang ingon niya, “Ginoo, Kinsa Ka man?”

“Saulo, Saulo, nganong ginalutos mo Ako?” Miingon Siya, “Ako mao si Jesus.”

<sup>27</sup> Miingon si Jesus, “Gikan Ako sa Dios, ug mobalik Ako ngadto sa Dios.” Siya kadtong Kalayo nga atua sa nagadilaab nga sapinit, nga nanguna kang Moises sa kamingawan, ug Siya mobalik ngadto Niana.

<sup>28</sup> Ug karon ania si Pablo, sa dalan paingon sa Damascus, nga gihampak. Ug kadtong tanan nga mga kalalaken-an nga kauban niya, wala man lang nila nakita ang Haliging Kalayo. Ug kadto ingon ka—ka tinuod gayud kang Pablo nga nagresulta sa pagkabuta sa iyang mga mata, ug gikinahanglan pa siyang giyahan paingon sa dalan nga gitawag og Matul-id, didto sa Damascus. Nabuta gyud siya.

<sup>29</sup> Si Ananias, ang propeta niadtong lugara, nakakita og panan-awon, miadto ug gipandongan si Pablo og mga kamot ug nadawat niya ang Espiritu Santo, ug nahulog ang mga himbis gikan sa iyang mga mata ug nakakita na siya pag-usab. Ingon ka tinuod gayud kadto kaniya nga nagresulta sa pagkabuta sa iyang mga mata, ug bisan pa niana ni usa sa mga kauban niya wala man lang maila nga atua diay Kini didto, para makita unta Kini.

<sup>30</sup> Mao—mao man pud kini karong gabhiona! Adunay usa dinha nga nagalingkod nga mahimo niyang paanhion ang Dios, samtang ang uban wala gyu’y hinanawan bahin Niini. Ang pag-ila mismo sa Dios!

<sup>31</sup> Ug si Jesus, niadtong ania pa Siya sa yuta, ug hingpit nga napasundayag ang ilhanan nga gihisgotan sa Biblia nga Iyang pagabuhaton, pero wala gihapon nila kini maila tungod kay dili man kini nagsubay sa ilang tradisyon. Para niadtong panahona, dili Siya moabot ug aron buhaton ang mga butang nga gibuhat kaniadto ni Moises. Moabot Siya ug igapanganak sa usa ka ulay. Ug Siya, ug sumala sa Deuteronomio 18:15, Siya mamahimong usa ka Propeta. Ug eksaktong gibuhat Niya ang maong mga buhat ug mga ilhanan.

<sup>32</sup> Ang mga Judio kanunay’ng nangita og mga ilhanan. Naitudlo sa ila nga dili gayud magadepende sa intelektuwal nga mga pamulong; dili mo madala sa ingon niana ang mga Judio. Ang mga Griyego ang natudloan og ingon niana. Pero

dili pinaagi sa intelektuwal nga mga pagpanulti, kondili sa mga ilhanan. “Pakitai kami og usa ka ilhanan.” Kining mga tawo, ang giingon sa usa, “Rabbi, o Magtutudlo, pakitai kami og usa ka ilhanan.” Gusto nilang manigurado. Ug human na Niyang gipakita kanila ang ilhanan, ug ang gusto nila og laing ilhanan, pero ang ilhanan lamang alang nianang kapanahonan ang mahimo Niyang ipakita.

<sup>33</sup> Mao sa gihapon ang ginabuhat Niya sa karon, kining pagbubo sa Espiritu Santo mao ang ilhanan sa Iyang pagpakita bisan sa niining panahon, ingon sa gisaad Niya.

<sup>34</sup> Nangita sila og ilhanan, ug gihatagan na Niya sila og ilhanan sumala sa Kasulatan, pero nagtinguha sa gihapon sila og laing ilhanan.

<sup>35</sup> Dinha kon diin daghang mga tawo ang nangalibog sa karon. Kabalo mo, spagmahitabo ang Pagsakgaw, ug hunahunaon n’yo na lang ang kasubo niini! Tugoti nga balikan nako kon diin si Jesus, o . . .

<sup>36</sup> Gipadala ni Juan ang iyang mga tinun-an didto kang Jesus, kung Siya na ba gayud ang Mesias o dili. Niadtong orasa, nagpakita Siya og daghang mga butang. Sa dihang mibalik na siya, ang mga tinun-an, para isulti kang Juan kung unsa ang nakita nila, nag-ingon si Jesus sa mga naglingkod didto, miingon, “Unsa man ang inyong giadto aron tan-awon sa kamingawan? Unsa man ang inyong giadto aron tan-awon niadtong nagwali si Juan? Miadto ba kamo para makita ang usa ka lalaki nga nagsul-ob og maputing bisti, ug kung unsa pa, o—o humok nga bisti?” Miingon, “Sila ang mga anaa . . . sa mga palasyo sa hari. Sila ang mga nanaglubong sa mga patay, ug nagahalok sa mga bata, ug nagakasal sa mga batan-on, ug uban pa, niana. Wala sila’y hibangkaagan sa paghawid sa espada nga duhay-pulohan.”

<sup>37</sup> Miingon, “Unsa ma’y inyong giadto aron tan-awon kung ingon-ana, usa ka bagakay nga ginakusokuso sa bisan unsang hangin, usa ka tawo, nga tanyagan siya sa usa ka grupo og gamay’ng kuwarta ug mopasakop siya dayon ngadto *niini* imbes nga sundon ang tawag sa Ginoo? Dili si Juan! Aduna ma’y mohaylo kaniya, moingon, ‘Hatagan namo ka og mas daku kung isalikway mo *Kini* ug dawaton *kini*?’ Dili si Juan!” Miingon Siya, “Unsa ma’y inyong giadto aron tan-awon kung ingon-ana, usa ba ka propeta?” Ingon Niya, “Ako magaingon kaninyo, ‘labaw pa gani sa usa ka propeta.’ Ug kung madawat ninyo kini, siya mao kadtong giingon sa propeta, ‘Tan-awa, Akong ipadala ang Akong mensahero sa atubangan Ko, nga maoy mag-andam sa dalan.’” Ug mao kana ang Malaquias 3, nga siya ang katumanan niini.

<sup>38</sup> Usa niana ka adlaw gipangutana Siya sa mga tinun-an, miingon, “Nganong nag-ingon man ang mga escriba nga si Elias kinahanglan mouna sa pag-anhi?” Miingon si Jesus, “Siya



nahianhi na ug wala ninyo nahibaloan kini,” ug nasabtan nila nga kini mao si Juan nga Bautista. Kadtong pinili nga mga tinunan wala man lang nila nakita kung kinsa siya. Nga si Elias na diay kadto.

<sup>39</sup> Karon tan-awa ninyo. Kabalo mo, ang—ang Pag-anhi sa Ginoo mao’y usa ka tinago nga pag-abot. Giingon Niya, “Adunay duha ka tawo sa higdaanan, ug pagakuhaon Ko ang usa ug biyaan ang usa,” kana’y kung asa—kung asa man ang gabii. “Duha ka tawo sa kapatagan, pagakuhaon Ko ang usa ug biyaan ang usa.”

<sup>40</sup> Kabalo mo, daghan kaayong mga tawo ang nagakawala adlaw-adlaw, ibabaw sa yuta, nga wala man lang nahibaloan ni bisan kinsa. Usa sa niining mga adlaw tingali makaingon ang mga tawo, “Bueno, ang buot mo bang ipasabot nga kini mao na ang dakung kasakitan, kining nagakahitabo na kanato sa karon? Abi ko nga kuhaon uná ang Iglesia sa dili pa ang kasakitan.” Wala nila maamgo ug masabtan nga ang Pagsakgaw mahimong nahitabo na diay ug wala sila’y hibangkaagan bahin niini; usa man gud kini ka sekreto nga pagbiya sa Iglesia.

<sup>41</sup> Ug, hunahuna n’yo, ang mga tawo magapadayon gihapon sa pagwali, og moingon nga nagatoo sila nga sila’y luwas, ug nagpadaghan pa og miyembro sa iglesia, ug nagapatukod pa og mga simbahan, ug nanagpadayon gihapon sama sa gibuhát sa mga tawo kaniadto sa kapanahonan ni Noe, ug uban pa, ug wala man lang nahibalo; nga ang Pagsakgaw tapos na diay, “nahanabo na kini ug wala ninyo hingbaloi.” Ginatos nga mga tawo ang mawala sa kalibutan ug walay hibangkaagan ang mga tawo kung asa napaingon kining mga tawo, dili na nila kini mabantayan; may mga tawong aduna lang giadtoan, wala na sila’y balita mahitungod kanila. Ug mao na diay kadto ang Pagsakgaw.

<sup>42</sup> Sultihan ko kamo, mga higala, dili buot pasabot nga tungod miyembro kamo sa iglesia, o mora’g ingon niana, wala kana’y unsa man nga kahulogan para kanamo. Mas maayo pa nga isul-ob mo kanang hinagiban. Mas maayo pa nga kuhaon mo na kanang tibuok Pulong sa Dios ug manggunit Niini, ug undangan na kining pang-Hollywood nga linihokan. Nakasulod na kini sa iglesia, ug makauulaw kini. Pero ang Hollywood nagapangidlap, nagpangidlap og ayo ang silaw niini, ug ang iglesia karon nagapaningkamot nga awaton ang Hollywood. Si Cristo wala sa Hollywood. Si Cristo anaa sa indibiduwal. Nagapangidlap ang Hollywood o... nagagilak-gilak ang Hollywood, samtang ang Ebanghelyo nagasiga sa kamapaubsanon. Ang Dios wala sa mga dagkung madanihong nindot nga mga lugar ug sa ingon nianang mga butang nga makita nato. Siya nagaabot nga adunay kamapaubsanon, diha sa pormang kaaghop ug kalomo, dayon moagi lang.

43 Ug kung kaila mo ang Pulong, makita mo Kini. Siya nga adunay mata, ang makapatalinghug, “magpatalinghug siya sa kung unsa ang ginaingon sa Espiritu ngadto sa mga iglesia,” tan-awa karon, karong panahona, ang gipaila na.

44 Gipaila Niya og ayo ang Iyang Kaugalingon sa mga magtotoo niadtong panahona, kanila nga nanagpaabot niini. Tan-awa ninyo si Pedro ug si Andres. Tan-awa ninyo si Natanael, wala man lang og pagduhaduha sa iyang hunahuna. Tan-awa ninyo kadtong babaye didto sa atabay, wala man lang og pagduhaduha sa niining butanga.

45 Pero kining mga Fariseo, mga pipila ka adlaw lang sa wala pa kining teksto nato karong gabhiona, nakita nila Siya nga ginabuhat kadto, ug dayon gibansagan nila Siya nga “Beelzebub, usa ka yawa.” Sa kadtong mga buhat nga naipamuhat. Kinahanglan nilang tubagon kadto sa ilang kongregasyon, busa ang butang lamang nga mahimong buhaton nila mao’y bansagan kadto nga “usa ka espiritu sa yawa.” Si Beelzebub usa ka yawa, sama sa usa ka manghihimalad o ingon niana. Ug si bisan kinsa nahibalo nga ang pagpanghimalad iya sa yawa. Ug sa niana nila kini ginatandi, samtang Siya mao ang Pulong nga nagatugkad sa tinago sa kasingkasing ug—ug ginapamatud-an nga Siya kadto ang Propeta nga pagabanhawon para kanato niadtong kapanahonan, ang Propetang-Manunubos; ug sa dihang gibuhat Niya kadto, ang maong iglesia niadtong panahona gibansagan hinoon Siya nga “Beelzebub.”

46 Nakita ba ninyo kung unsa sila? Ang ingon Niya, “Mga buta kamo, nga nagaagak sa mga buta.” Ayaw nila mosulod, ug ayaw pud nila nga makasulod didto kadtong mga miyembro nila.

47 Ang gusto natong buhaton sa karon mao’y hibaloon ang Kamatuoran. Gikinahanglan natong hibaloon ang Kamatuoran. Kung Siya mao ra ba sa gihapon? Ania ba Siya aron tumanon kung unsa ang gisaad Niya nga pagatumanon? Susiha ang mga Kasulatan ug hibaloon ninyo kung unsa ba ang angay Niyang buhaton sa karon nga panahon.

48 Mao kana ang hinungdan nga si John Wesley. . . o si Martin Luther dili puede dalhon ang mensahe ni Wesley; giorganisa man gud nila kini, mao nga hangtud didto na lang kadto. Dayon miabot si Luther, nga migawas sa iglesiang Katoliko, ug siya para sa ila. . . Usa siya ka buang, sa ilang tan-aw; pero aduna siya’y mensahe sa pagpamatarung, tungod kay Kadto mao man ang Pulong sa Dios, nga gisaad. Dayon sila, human nga namatay siya, giorganisa nila ang organisasyong Luther. Pagkahuman unsay nahitabo, mikurayot na pud kini pag-usab.

49 Ug sumala sa Kasulatan gikinahanglan nga adunay motungha nga usa na usab ka kapanahonan sa iglesia, ug, sa dihang mitungha kini, ang Kapanahonan sa Iglesiang Filadelfia,

si John Wesley. Ug ang nahitabo, paingon sa kasadpan kanunay ang paglihok niini. Ug sa dihang mitungha kini, atua ang maong kapanahonan sa iglesia, ug mitungha si John Wesley, pero dili kadto madawat ni Luther tungod kay organisado na sila sa pagpamatarung. Dili niini madawat ang pagpabalaan.

<sup>50</sup> Pagkahuman sa dihang nag-organisa usab ang mga Wesleyan sama sa gibuhat nila, ug misalingsing ang gagmay'ng mga sanga, nga ingon niana, dayon miabot na ang Pentecostal nga mensahe bahin sa pagpanag-uli sa mga gasa; wala ni usa kanila ang nakapadayon man lang, organisado na man gud sila.

<sup>51</sup> Karon ang makaluluoy'ng bahin niini, bisan ang mga Pentecostal organisa na pud kaayo.

<sup>52</sup> Tan-awa ninyo ang kapanahonan nga gikinabuhian nato, kung unsa ang gisaad alang niining panahona. Asa na man kita? Nanagpadayon kita. Nagapadayon ang Haliging Kalayo, ug ang mga anak ni Israel kaniadto nanggipadayon pud kauban ang Haliging Kalayo o kung dili mobalik sila sa Egipto. Kinahanglan nato nga magpadayon kauban ang Pulong.

<sup>53</sup> Ug karon nangahimong tapulan na kita, ang iglesia nangahimong makalibutanon ug nangabugnaw na, ug ang mga panghunahuna nila nahugawan na og ayo sa telebisyon, ug sa *We Love Sucey* ug uban pa niining mga maas nga mga butang, ug nagpabilin na lang sa balay. Ginapakita lang niana kung asa nakapunting ang kasingkasing sa mga tawo. Ug kung isulti mo sa ila nga sayup kining mga butanga, ug hunahunaon nila nga nabuang ka. Unsa man kini? "Mahigugmaon sa mga kalingawan labi pa kay sa paghigugma sa Dios." Kita n'yo?

<sup>54</sup> Oh, ang pinakadakung kalingawan nga akong hingbaloan, mao ang mag-ampo hangtud nga akong maamgo nga ako anaa na sa Presensiya sa Dios, ug maila ko kini. Sa hunahuna ko mao kana ang angay'ng gikahinaman sa Iglesia, ang Presensiya sa Balaang Espiritu; ang makita ang Dios nga maoy nagsaad sa niining saad nga ania sa taliwala nato, ang mabati ang Iyang Presensiya ug makita ang Iyang Pulong, ug ang makita Kini nga gipanghimatud-an. Makahatag gayud Kini og pagtoo, nga ang mga bakul makalakaw, ang mga buta makakita, ang mga bungol makadungog, ang mga amang makasulti.

<sup>55</sup> Nagtindog ako kaniadto didto sa South Africa, kon diin adunay duha ka gatus ka libo nga mga tawo ang nanambong didto sa lumbaanon og kabayo didto sa Durban, ug sa dihang nakita niadtong mga tawo sa usa ka higayon lang nga nahanabo kadto nga ingon niana, human nga maipasabot kana kanila, sa hinayhinay nga pamaagi; ug nakita nila ang usa ka butang nga nahinabo, ang butang nga gipadayag, ug baynte-singko ka libo nga mga tawo ang nangaayo dihadiha sa usa lang ka higayon. Nagdala sila didto og pito ka van nga gipuno og ayo, mga truck nga ingon niini ka taas gikan *dinhi*, de unom- ug de diseotsong-

ligid nga ingon niana, ug gipangkamada nila didto ang mga daang sungkod ug mga ingon-anang butang. Mga pagano, nga di man lang gani nila masayran kung asa ang tuo ug walang kamot.

<sup>56</sup> Ug pagkasunod adlaw, si Mr. Sidney Smith, nga mayor sa Durban, gitawgan niya ako ug miingon, “Dungawa gani sa bintana nimo, nga nakaatubang sa Indian Ocean, makita mo ang usa ka butang nga wala pa nimo sukad makita.” Ug atua kadtong escort nga mga pulis didto sa dalan nga ginaubanan kadtong pito ka dagkung puno kaayong mga van, og sa likod niini gatusan ka mga tawo ang nanaglakaw, nga sa miaging adlaw sakay pa sa maong mga stretcher ug mga teheras ug mga dayonganan nga dala-dala nila niadtong, nanag-awit, “Only believe, all things are possible.” Usa ka semana sa wala pa kadto, didto, may panag-away sila sa usa’g usa, tribong panag-away. Ug atua sila didto nanaglakaw, nga nag-inakbayanay, naghinawiray sa kamot.

<sup>57</sup> Ngano man? Naila man nila nga ang Dios sa Langit nagpakita sa ilang atubangan diha sa porma sa Iyang Pulong. Ug kita nga mga intelektuwal nga Amerikano palingkod-lingkod lang. Mangabanhaw sila sa Adlaw sa Paghukom ug pagahukman kining henerasyon, sa mga butang nga atong nakita.

<sup>58</sup> Nahinumduman nako ang usa ka babaye sa Louisville, Kentucky, dili pa lang dugay, aduna siya’y dalang gamay’ng bata, naglakaw-lakaw didto sa usa ka baligyaanan. Ug may ginagunitgunitan siyang gamay’ng butang, gipaningkamotang makuha ang atensyon niadtong bata, ug ang gamay’ng bata nagatan-aw nga nagalutok lang. Ug sa ulahi may gikuha ang babaye nga gamay’ng dulaang-kampana, bisan unsa na lang nga madani ang alinggat sa gamay’ng bata nga ingon niana ka gamay. Ug gibagting sa babaye ang gamay’ng dulaang-kampana, ug ang gamay’ng bata nagtan-aw lang diretso nga galutok ra. Ug sa kalit lang misiyagit ang babaye, ug natumba, ug may mga tawo didto nga mitabang niadtong babaye. Ang ingon sa babaye, “Oh, dili, di puede nga mahitabo kini! Di puede!”

Miingon, “Unsa ma’y problema?”

Nag-ingon, “Ingon man gud sa doktor nga mamaayo na ang bata.”

Miingon, “Unsa diay problema sa bata, gining?”

<sup>59</sup> Miingon pa, “Buena, giatake ra siya nga unom na ka bulan ang nangagi, nga human niadtong galingkura ra siya ug galutok na lang. Bisan pa man, napukaw ko na unta ang atensyon sa akong bata, di ko gihapon makuha ang iyang atensyon, ug galingkura ra ug galutok lang. Ang ingon sa doktor kanako nga hunahuna niya okey na ang kahimtang sa bata. Ug mao nga gidala ko dinhi ang bata, para palitan og gamay’ng dulaan aron sa ingon madani ang iyang atensyon, ug wala ma’y pulos gihapon. Galingkura ra man siya ug galutok lang.”

60 Sa ingon niana usab nagapadulong ang iglesia! Giuyog na sa Dios ang matag saad sa Biblia, sa ila mismong atubangan. Bisan pa niana galingkura ra kita sa gihapon ug galutok lang, nga nagatan-aw ra. “Unsa? Pakitai ako og usa ka ilhanan, kung mahimo?” Ug padayon man kini nagakahitabo sa tanang mga panahon, sa palibot nato mismo. Nga Ginahatud ang Presensiya sa Dios, og nadan-agan na unta kita niini. Pag nagsaad ang Dios, barugan gayud Niya kana nga saad. Oo, sir.

61 Human nga napamatud-an og ayo ni Jesus ang timailhan sa Iyang pagka-Mesias, nga Siya gayud ang maong Mesias, pero bisan pa niana, “Pakitai kami og usa ka ilhanan.” Kita n’yo, wala gyud nila maila, anaa ra kini mismo sa ilang atubangan. Wala gyud sa ila ang pagtoo.

62 “Kaninyo,” sama sa ginaingon sa buotan kong inahan sa una nga nagdaku sa habagatan, “wala ka’y makuha nga dugo sa usa ka singkamas, tungod kay wala ma’y dugo sulod niini.”

63 Wala gihapon nila Siya maila, nabutahan na og ayo tungod sa ilang mga kredo ug—ug—ug sa uban pa, nga anaa kanila niadtong panahona. Wala gyud nila nahibaloan ang mga Kasulatan bahin sa maong saad, tungod kay natabonan kadto sa mga kredo. Ang ilang mga kredo ug mga tradisyon niadtong panahona ang nagtabon sa maong saad sa Kasulatan. Kung gikatudloan lang unta sila subay sa Kasulatan, nga mao na kadto mismo ang ilhanan nga nagsunod sa Mesias!

64 Pila man ang nagatoo nga Siya miabot uban ang husto Niyang ilhanan? [Nagaingon ang mga kongregasyon, “Amen.”—Ed.] Oo, gyud Siya, miabot Siya nga subay gayud sa saad. Pero natudloan na sila og ayo sa kredo, “Nagatoo kami sa *niini*, ug nagatoo kami sa *niana*. Tanan man pud sila nagatoo sa Dios. Tanan man pud sila . . .”

65 Sa karong panahon, kitang mga Amerikano, ilabina, gihunahuna nato nga mapalingkawas kita tungod kay dagku man ang atong ginapangtukod nga mga simbahan, ug adunay banggiitan nga mga pastor ug ingon-anang mga butang. Hinumdumi, kung ingon niana man, ang Dios dili-matarung kung pasudlon Niya kita nga ingon niana na lang; kay, si Cain ug Abel, ang duha nga pinakaunang magsisimba sa gawas sa Eden, nagtukod pud sila og halaran sa Ginoo, pareho silang naghimo og halad, pareho silang naghalad og mga gasa, pareho silang nag-ampo, pero ang usa husto ug ang usa sayup. Matikdi, kinahanglan aduna kanato ang Kamatuoran, ug ang Kamatuoran mao ang Pulong sa Dios, sa kanunay. Karon ingon niana pud kini sa pahanon karon, ang mga tawo daw sa nabutahan na og ayo. Ingon nila . . .

Ingon ko, “Usa ka ba—usa ka ba ka Cristohanon?”

66 “Oh, miyembro man ko sa ingon niini-ingon niana.” Kita n’yo, wala man kana’y kahilambigitan niini. Wala ko’y unsa

mang supak niana, pero dili man kana ang gipaningkamotan kong isulti kaninyo. Magpamiyembro kamo sa unsa mang simbahan nga gusto ninyong pamiyembrohan. Wala’y kalabotan niini ang kung unsa nga denominasyon ka.

<sup>67</sup> Gisugilon nako sa pastor kaganinang buntag. Didto man gud sa Colorado kanhi ako nagakuyog sa pagpaningub sa mga baka didto, ug uban pa. Ug kanhi ako maglingkod didto, nga nakatungtong ang akong mga tiil sa angkasanan sa kabayo, nga sama *niini*. Ug ang Troublesome River Hereford Association nagapasabsab didto sa Troublesome River Valley. Dayon pagtungas mo didto sa ibabaw niadtong walog, mamakita mo ang ga-sanga nga dalan nga pasidlanan ug pakasadpan. Ang tanan nga mga baka gikan *dinhi* manungas, nga lakip sa Asosasyon, ginapasabsab didto sa kasadpan nga sibsibanan; ug—ug ang grupo nga akong giubanan, mao’y sa sidlakan nga sibsibanan ginapasabsab. Dayon aduna sila didto og naka-barbe wire nga koral para dili makaadto ang mga baka sa pribadong yuta, ug didto ako sa kabukiran sa tibuok ting-init.

<sup>68</sup> Ug pangtapukon namo didto ang mga baka, upat o lima ka nagkalainlaing marka, walo o napulo ka nagkalainlaing marka, gikan sa suba, tapukon namo kadtong mga baka sa tingpamulak, dalhon namo sila didto sa ibabaw. Ug molingkod ako didto, nga ang akong tiil ginatungtong ko sa perilya niadtong angkasanan, human namo napangtapuk na ang tanang mga baka, tanan sila naka-marka ug tanan na, ginapabalik na namo sila sa sibsibanan.

<sup>69</sup> Ug ang rantsero nakapuwesto na didto. Gina-ihap niya ang mga baka samtang pasulod sila. Ug namatikdan nako nga atua didto ang tanang nagkalainlaing marka. Kang Mr. Grimes ang—ang—ang Diamond Bar, ug sa unahan namo Turkey Track ang sa ila, Old Tripod pud ang sa amoa, ug adunay nagkalainlaing marka ang nagaagi didto. Pero wala panumbalinga sa—sa rantsero kung unsa ang marka. Ang ginabantayan niya ang tag sa dugo nga gikab-it diha sa dalunggan sa baka. Wala’y laing makasulod niadtong sibsibanan, para malakip sa asosasyon, kadtong baka lang nga puro gyud ang liwat, wala’y laing makasulod didto gawas sa purong liwat nga Hereford lang. Kinahanglan nga makab-itan ang dalunggan niini, og tag kung unsay dugo niini.

<sup>70</sup> Ingon niana pud kini sa pag-abot sa Paghukom. Dili Niya ako pangutan-on kung usa—usa ba ako ka Methodist, Baptist, Presbyterian. Unsa man ang akong marka wala kana’y bili para Kaniya. Wala na’y lain pa kondili ang mga natawo na pag-usab, Cristohanon nga natawo pinaagi sa Dugo nga iya sa Dugo ni Jesus Cristo, kana lang ang makasulod didto. Gawas niana walay makasulod. Karon gusto natong hinumduman, hinumduman kana.

<sup>71</sup> Karon, sa dihang dili Siya maila, ang Iyang gahum sa kanu-... sa kanunay'ng dili mapadayag, sa dihang dili Siya maila. Bisan unsa pa ka klaro nga ania gyud ang Dios, kinahanglan mong toohan kini. Kana lang.

<sup>72</sup> Sama kaniadtong babaye nga may talinugo. Silang tanan nga mga tawo nga nagaagi, ug silang tanan nga nanagtindog didto, nanag-ingon, "Ania na ang Rabbi. Mao kanang Lalaki nga nagaangkon nga usa kono Siya ka Propeta. Panatiko kini," ug tanan na nga ingon niana.

<sup>73</sup> Pero unsa ang nahitabo? Kining gamay'ng babaye nga may talinugo, ug nakadungog siya bahin sa niining Lalaki. Ug sa dihang miadto na siya didto, bisan unsa pa ang ginaingon sa uban, naila niya mismo kung Kinsa si Jesus. Ug miingon siya, "Kung mahikap ko lamang ang Iyang bisti!" Kita n'yo?

<sup>74</sup> Ug sa dihang ang maong lunsay'ng pagtoo, sa Dios, nahimong positibong butang ngadto sa babaye, unsa man ang gipagawas niadto? Gipagawas niadto ang Iyang gahum aron ayohon ang maong babaye. Nahikap Siya niadto sa paaging, milingi Siya ug gisultihan ang babaye kung unsay problema niini, miingon, "Giluwas ka sa imong pagtoo." Unsa ang nagluwas? Pagtoo!

<sup>75</sup> Dunay ubang nagtindog didto siguro nga mas grabe pa ang kahintang kay sa babaye, pero, nakita n'yo, naila man gud sa babaye ang Iyang Presensiya. Nahibaloan niya nga kadto na ang iyang oportunidad.

<sup>76</sup> Kung mahimo lang unta nato kana karong gabhiona, mga igsoon! Kung mahimo lang unta nato nga maila nga Siya nagapakita kanato sa niining mga panagtigum, nga adunay usa ka katuyoan, kana'y, ang mapagawas ang atong mga tinguha diha Kaniya, nga ihatag sa ato. Pero kinahanglan nato una nga maila ang Iyang Presensiya. Ug karon unsaon ninyo sa pag-ila sa Iyang Presensiya, sa dihang ang gisaad nga Pulong para sa *niining* kapanahonan napadayag na, dili ang gisaad nga Pulong alang sa kapanahonan ni Moises, o unsa pa mang ubang mga kapanahonan, kondili ang mismong gisaad nga Pulong para sa *niini* nga kapanahonan!

<sup>77</sup> Karon nahibaloan nato nga nagpadayon lang Siya sa paglakaw. Ug si Jairo, usa ka luoy'ng lalaki niadtong lugara nga ang anak niyang babaye patay na, siya, mitoo siya kung unsa ang isulti ni Jesus mao ang Kamatuoran. Karon hinumdumi, usa siya ka saserdote, ug dili siya puede, tungod kay estriktong gimando kaniadto, "ang si kinsa man nga mouban-uban sa niining Lalaki palagputon gikan sa sinagoga." Bueno, palagputon man siya o di siya palagputon, kumbinsido gayud siya nga ang Dios atua gayud kang Cristo, ug mao mismo kadto ang Pulong. Ug unsa may nakuhang kaayohan niadto? Gipagawas ngadto kaniya ang gahum sa pagkabanhaw nga anaa kang Jesus; amen, gibanhaw

ang batang babaye nga patay na, ug nga gihaya na, tungod nga naila man niya nga ang Dios anaa kang Cristo, ug ang Iyang Presensiya anaa sulod sa iyang panimalay.

<sup>78</sup> Pero didto sa mismong siyudad kon diin nagdaku si Jesus, anaa na man Kaniya ang mao rang gahum, didto sa siyudad kon diin Siya nagdaku, apan wala gyud Siya naila niadtong mga tawo didto. Ang Iyang Presensiya, para kanila, walay bili; giisip pa hinoon nga usa Siya ka panatiko. “Asa na diay kadtong mga milagro? Gisulti nila kanako nga makahimo Ka man kono sa pagbuhat og *ingon niini-ug-ingon niana*. Pakitai ko nga ginabuhat Mo pud kana dinhi.”

<sup>79</sup> Dili ba nadungog n’yo na pud kana? “Kung aduna ma’y. . . Kamo nga grupo sa mga pentecostal, ug kamo nga mga tawo, nga, nagatoo kono kamo sa Langitnong pagpang-ayo? Ania si *ingon niini-ug-ingon niana* dinhi, sige raw patan-awa ako nga ginaayo ninyo siya.”

<sup>80</sup> Mao kana ang mao rang karaang yawa, ang mao ra kaniadto nga nagsulti, “Kung Ikaw ang Anak sa Dios, sugoa kini nga mga bato nga mamahimong mga tinapay.”

<sup>81</sup> Ang mao rang karaang yawa, niadtong ginataptapan niini ang Iyang mga mata, gibunalan nila sa usa ka kahoy ang Iyang ulo, ug miingon, “Karon,” ingon nga gipasa na ang maong kahoy, ngadto sa usa pa, ug miingon, “itug-an kanamo kung kinsa ang mibunal Kanimo, ug motoo na kami Nimo kung Ikaw usa ka Propeta.” Wala gyud Siya magsulti. Wala Siya nagapanghambog ni kang kinsa man. Oo.

<sup>82</sup> Mao usab, sa dihang didto Siya sa krus, miingon, “Kung Ikaw ang Anak sa Dios, kanaug sa krus ug ipamatuod nga Ikaw ang Anak sa Dios.” Mahimo man Niyang buhaton kadto.

<sup>83</sup> Nahatagan Siya sa mga tawo og pinakalabing hataas nga pagpasidungog nga maihatag nila Kaniya, didto, apan wala nila kadto hingbaloi. Nanag-ingon sila, “Giluwas Niya ang uban; ang Iyang Kaugalingon wala Niya luwasa.” Kung giluwasa Niya kaniadto ang Iyang Kaugalingon, wala Niya unta naluwas ang uban. Gihalad Niya ang Iyang Kaugalingon para maluwas ang uban. Kita n’yo, wala nila maila ang Presensiya sa Dios. Kana lang.

<sup>84</sup> Karon ginapagawas niini ang gahum sa pagpang-ayo, ug unsa? Mamahimo pud niini nga ipagawas ang gahum nga ablihan ang inyong mga mata para maila Siya, o butahan ang inyong mga mata para dili gyud ninyo Siya maila. Ang mao rang nagaabli sa mga mata sa usa, mao ra pud ang nagasarado sa mga mata sa dili-magtotoo.

<sup>85</sup> Pero, ang siyudad, wala gyud sila’y pagsalig diha Kaniya. Didto sa balay sa Fariseo, gidapit niya Siya didto; didto sa balay ni Simon, nga usa ka Fariseo, ug nag-andam kini og dakung panihapon, ug gustong pamatud-an niadtong Fariseo sa mga



nanambong nga dili Siya Propeta. Busa atua siya nga nagatagay alang sa pagpasidungog gamit ang iyang mga baso ug iyang mga copa, ug tanan nga maanindot niyang mga pahumot sulod sa balay.

<sup>86</sup> Ug si Jesus wala man lang panumbalinga niadtong tagahugas sa tiil, ug naglingkod na lang didto sa daplin. Ug, nagkabuling-buling, ang baho sa—sa uma midikit na sa Iya, didto sa dalan kung asa nagaagi pud ang mga mananap, ug midikit na sa Iyang bisti. Mao kana ang hinungdan kung nganong nagahugas sila og mga tiil sa ilang panahon.

<sup>87</sup> Ug, nakita n'yo, ang pinakaunang butang, sa higayon nga imbitado kamo sa—sa usa ka panimalay didto sa Palestina, niadtong panahon nga ang sul-ob lang nila sa dalan mao'y sandalyas, ang pinakaunang butang nga buhaton nila mao'y hugasan ang inyong mga tiil, ug dayon adunay ihatag sila sa inyo nga sapin sa tiil; aron gamiton sa paglakaw didto sa ilang mga karpit, nga mga mahalong alpombra nga gikan pa sa Persia ug tanan na, nga maanindot.

<sup>88</sup> Ang sunod nga butang nga ilang buhaton, butangan ka nila og daghang lana sa imong kamot. Duga kini gikan sa gamay'ng mansanas nga makaplagan didto sa halayong bukid, mansanas nga de rosas. Human nga malaya kadtong rosas, mabilin na lang kadtong mansanas ug nindot nga pahumot. Ug ihaplas nila—nila kadto sa ilang nawong. Ug ang direktang silaw man gud sa adlaw didto sa Palestina grabe gyud kaayo, ug, nakita n'yo, manimaho'g adlaw gyud ka. Ug—ug pagkahuman mong ihaplas kadto, nianang tungora ang tag-balay na magtagbo didto sa pultahan ug halokan niya sa liog ang mga bisita ug hinangup silang dawaton.

<sup>89</sup> Nganong nabuhat niadtong mga tagahugas og tiil nga pasagdan lang nga makaagi si Jesus, nga wala man lang hugasi ang Iyang mga tiil o—o—o hatagan unta Siya og lana aron ihaplas sa Iyang Kaugalingon, o bisan nga halokan man lang unta Siya ingon nga ilhanan nga Siya'y ginaabiabi?

<sup>90</sup> Pero may gamay'ng bigaon nga atua sa dalan. Silang tanang mga relihiyoso nga anaa na sulod sa balay, ang tanan nga anaa didto wala man lang mag-ila Kaniya. Ug usa ka gamay'ng babaye nga may mahugaw'ng dungog, milili siya, tingali didto sa pultahan sa gawas, ug nakita niya Siya nga naglingkod lang didto ingon nga mora'g usa ka tinamay.

<sup>91</sup> Ingon niana usab Siya sa karon taliwala sa grupo sa mga relihiyon, usa ka tinamay, wala abiabiha, wala kinahanglana. “Mangil-ad, mahugaw, holy-roller,” kana ang tawag nila Niana, “mora ba'g usa—usa ka tawong wala sa hustong pangisip; usa ka manghihimalad, mental telepathy,” o usa ka matang sa pagbansag nga dautan.

<sup>92</sup> Ug si Jesus, paingon na ta niini sa pipila na lang ka gutlo, miingon, “Magasulti’g batok sa Anak sa tawo, puede pa kamo mapasaylo; apan pagmiabot na ang Espiritu Santo ang pagbuhat sa samang butang, usa ra ka pulong nga batok dili na gayud pasayloon.” Kita n’yo?

<sup>93</sup> Apan nakita sa gamay’ng babaye didto nga kinahanglan Niya ang serbisyo. Ug dalidali misulod ang maong babaye, miadto siya nga dala ang botilyang alabastro nga puno og lana. Siguro gipalit niya kadto gamit ang kuwarta gikan sa iyang pagkabigaon. Apan unsa man kadto? Nahunahuna niya siguro nga kadto, “Usa Siya—usa Siya ka Propeta. Pero nahinumdom ako sa usa pa ka babaye nga sama nako, usa pa ka tawo nga sama nako; nahatagan siya og oportunidad ug naila niya Siya, ug siya gipasaylo.” Didto sa atabay sa Sicar, nahisgotan nato kini kagabii. “Ug kung makaduol lang unta ko Kaniya, kabalo ko kung Kinsa Siya, serbisyon ko gayud Siya. Bisan atua pa silang tanan, dili ko igsapayan kung usa ma’y buhaton nila. Serbisyon ko Siya. Maila gyud nako Siya nga mao ang Anak sa Dios.”

<sup>94</sup> Midagan siya pasulod. Nakaduol siya ngadto Kaniya, nabati niya nga makasasala gyud siya. Ingon gyud niana ang bation sa usa ka makasasala nga nagahinulsol og tinuod diha sa Iyang Presensiya, makasasala gyud!

<sup>95</sup> Ug nagsugod sa pagtulo ang iyang mga luha, ug gipaningkamotan niya nga itago kini. Nangahulog ang iyang mga luha ngadto sa mga tiil ni Jesus. Haplasan na unta niya og lana si Jesus, pero padayon ang pagkahulog sa mga luha niini diha sa Iyang mga tiil. Ug gisugdan og pahid sa babaye ang nangahulog nga mga luha, ug—ug sige siya’g hilak, nga—nga ginapahiran kadto sa iyang mga kamot. Ug—ug ang mga tiil ni Jesus nagkaramutsing na tungod sa hugaw; ug—ug kung matoohan ninyo kana, nga bisan midikit na kadtong baho sa hugaw sa mga mananap gikan sa dalan, og mao ra nga dalan ang ginaagihan sa tanan. Ug atua, ang midikit nga baho Kaniya, samtang naglingkod didto, ug ang mga luha sa babaye nangahulog diha sa Iyang tiil, ug gipaninguhaan sa babaye nga pahiran aron matangtang kadto. Ug wala siya’y toalya nga pangpahid.

<sup>96</sup> Unsa man ang kaanyag ug dungog sa usa ka babaye? Ang iyang buhok. Mao kana kon nganong ginapaputlan sa mga babaye ang ilang buhok karon. Sayup kana. Ang babaye, gigamit sa maong babaye ang iyang buhok ug hugasan kadtong . . . Iyang mga tiil, ug gipahiran kadto, sa iyang—iyang buhok nga nindot, nga ginatangtang kadtong baho nga midikit kang Jesus, paingon kaniya, nga ginapas-an ang pagpakaulaw tungod Kaniya. Oh, grabe! Ingon gyud niana ang mahitabo kung naila nimo kung Kinsa ang anaa sa atubangan mo. Kita n’yo? Ang atong mga igsoong babaye halos motindog na siguro sa ilang ulo, aron lang

igo ang kadaghan sa buhok ang makaabot para mahimo nila kadto. Busa atua siya nga gihugasan ang mga tiil ni Jesus, ug gipahiran kadto gamit ang mismong buhok sa iyang ulo, ug gihalokan niya ang Iyang mga tiil.

<sup>97</sup> Ug ang tigulang nga si Simon nga nagatindog didto, ang ingon, “Huh! Huh!” Oh, Makita nako siya nga halos mobuto na sa kasuko. Wala niya maila kung Kinsa si Jesus. Miingon, “Gisulti ko na bitaw sa inyo nga dili gyud Siya usa ka Propeta. Kung Propeta pa Siya, maila unta Niya kung unsang klase sa babaye kanang anaa sa atubangan Niya.”

<sup>98</sup> Wala gyud gilihok ni Jesus ang Iyang tiil. Gisud-ong lamang Niya ang babaye. Ug nahadlok ang maong babaye.

<sup>99</sup> Pagkahuman nga natapos na Siya, og nahuman na sa pagserbisyo ang babaye ngadto Kaniya, milingi Siya, og miingon, “Simon, aduna Ko’y isulti sa imo. Giimbitar mo Ako dinhi. Gipaani mo Ako dinhi,” sa ubang pinulongan, para gamiton aron itaas ni Simon ang kaugalingon niini. “Ang gusto mo lang diay nga mapaulawan Ako. Ang gusto mo lang maoy pamatud-an nga dili Ako mao kung kinsa gyud Ako. Ug ikaw, sa dihang gipaani mo Ako dinhi, di ba kinahanglan man nimo nga hugasan ang Akong mga tiil, pero wala nimo buhata. Di ba kinahanglan unta nga hatagan mo Ako og lana para ibubo Ko sa Akong ulo, pero wala pud nimo buhata. Wala pud Ko nimo gihalokan ingon nga ginaabiabi mo Ako. Ug kining babaye, sukad sa pag-abot Ko dinhi, gihugasan niya og mga luha niya ang Akong mga tiil, ug gipahiran sa iyang—iyang buhok, ug wala’y hunong nga ginahalokan ang Akong mga tiil sukad pag-abot Nako dinhi. Butang nga ikasaway Nako sa imo, Simon.”

<sup>100</sup> Pagkahuman miatubang Siya sa babaye. Mahunahuna ko lang ang maong babaye nga nagatindog didto, ug ang dagku nindot niyang mga mata nagkabulingit og ayo, ug mao pud ang iyang nawong, ug midikit na sa iya kadtong grasa ug—ug mga abog gikan sa dalan, mitapot na sa iyang nawong. Ug sa hunahuna niya, “Karon sayup ba ang nabuhat ko? May nabuhat ba akong sayup?”

<sup>101</sup> Miingon si Jesus, “Ug ginasulti Ko niining babaye, ang iyang ‘mga sala nga daghan, gipasaylo na tanan. Maglakaw ka nga magmalinawon.’”

<sup>102</sup> Unsa man kadto? Naila sa maong babaye. Naila niya ang iyang oportunidad. Kita n’yo? Gibuhat niya. Giserbisohan niya si Jesus. Wala kadto buhata niadtong mga Fariseo. Nasaksihan kadto sa babaye ug naila niya ang Iyang Presensiya, ug unsa man ang kahimoan niini? Naghugas kini. Unsa man ang gipagawas ngadto sa babaye? Kapasayloan. Napagawas ngadto sa babaye, ang kapasayloan para sa iyang mga sala. Unsa pud ang gibuhay niini? Nagpagawas usab kini og gahum sa Dios, para ipakita ngadto sa mga dili-magtotoo nga Siya usa ka Propeta. Nakaila

Siya kung kinsa ang maong babaye. Nagpagawas usab kini og kalipay ug gahum ug Kinabuhing Walay Katapusan. Mga ingon niana ang gipagawas niini.

<sup>103</sup> Pero ang tawong nagpahinungdan nga mailubong gyud og daku ang lansang diha sa bililhon Niyang mga tiil, wala gayud maila sa niining tawo ang Presensiya sa Dios nga anaa kang Jesus. Ang gusto pa gani niya nga magpakita si Jesus og unsang barut nga madyik kaniya, butang nga makapalingaw.

<sup>104</sup> Mao kana ang gusto sa kalibutan, karon, mga butang nga makapalingaw. Ayaw nila sa Ebanghelyo. Ang gusto nila kanang malingaw lang sila.

<sup>105</sup> Ug miingon si Pilato, “Gusto kong makakita og unsa man nga milagro gikan Kaniya, o mora og ingon-ana. Dalha ninyo Siya dinhi.” Presensiya mismo sa Dios, ug nahimo sa gihapon Kini nga ibaliwala, tungod kay (unsa?) mas bililhon man kaniya ang—ang opinyon sa publiko kay sa mahatagan niya og bili kadtong kahigayonan nga mapaingon siya sa Presensiya sa Dios. Unsa man ang nahanabo? Gipasaylo ang babaye, ug gihatagan og Kinabuhing Walay Katapusan; pero si Pilato nawad-an sa iyang pangisip ug nabuang, ug nagpakamatay pinaagi sa paglumos sa iyang kaugalingon didto sa Switzerland.

<sup>106</sup> Karon, gikabalak-an niya, og mas gitagad niya ang popular nga opinyon niadtong panahona, nga, “Usa Siya ka Beelzebub; Siya usa lang ka manunundog; wala ka’y makuha Kaniya,” kining si Pilato, unsa man ang gibuhat niya? Iya kadtong nawala, nawala niya ang mismong kahigayonan na unta niya sa Presensiya sa Dios. Napasaylo na unta siya. Ang ingon niya, “Ako may kagahum nga ipalansang Ka sa krus. Ako may kagahum nga buhian Ka.”

<sup>107</sup> Miingon si Jesus, “Wala ka’y gahum gawas nga nagagikan kini sa Akong Amahan.” Naila na unta niya, kung nahibaloan lang niya ang Kasulatan. Ug nga siya, usa pa gyud Judio, nahibaloan na unta niya. Pero, nakita n’yo, tungod sa mga tradisyon nga naitudlo kaniya. Ingon niana pud kini sa karon nga panahon. Kung natudloan lamang unta siya sa husto! Kung mitoo lang unta ang maong tawo sa kung unsa ang giingon sa mga Kasulatan! Pero gipahisalaag na siya sa iyang tradisyon palayo niini.

<sup>108</sup> Mao ra pud kini sa karong panahon. Nakita na mismo sa mga tawo ang tinuod nga Ebanghelyo, kon diin ang Espiritu Santo nagaabot na, ug ang gahum ug kahimayaan sa Dios nga ginaluwas ang mga makasasala gikan sa kasal-anan ug ginahatagan sila og kagawasan, ug ginabautismohan sa Espiritu Santo, ug ginapang-ayo ang mga sakit, ug ginapakita ang mga ilhanan ug mga katingalahan, ug molikay ang mga tawo, moingon, “Ah! Kabalo ka ba kung unsay pagtoo niini sa akong iglesia? ‘Wala kana’y pulos!’” Kita n’yo, nawala n’yo;

ginabaligya ninyo ang inyong pagkapanganay nga katungod. Usa ka bag-ong Esau!

<sup>109</sup> Daghan ang nahatagan og parehong oportunidad sa karong panahon, ang maanaa sa Iyang Presensiya sama sa ila kaniadto. Ug sa gihapon, tungod sa popular nga opinyon, gibalibaran nila Kini. Ingon nga anaa na sa Presensiya sa Dios! Nahunahuna ko, mga higala, karong gabhiona, unsa kaha kung kita nga mga Cristohanon, diha sa Iyang Presensiya, ug may sakit, unsa kaha kung dili nato balibaran ang oportunidad nga mamaayo pinaagi sa pagtoo Kaniya? Kita nga mga nanag-angkon nga nagatoo Kaniya, sa tinuod wala gyud nato maila ang Iyang Presensiya, og kung unsa ang mga gisaad Niya sa karong panahon.

<sup>110</sup> Ingon nga gipamatud-an na pinaagi sa saad para nianang panahon, ginabadlong ni Jesus kadtong henerasyon tungod sa dili pagtoo sa Iyang Mesiasnon nga ilhanan. Makita nato dinhi, ginabadlong Niya sila. Sa pagtawag sa Iya nga Beelzebub! Gusto sa mga tawo nga buhaton Niya ang ilhanan ni Moises, siguro, ipabuka ang Pulang Dagat. Gusto nilang buhaton Niya ang ilhanan ni David, bawion ang trono ug ang gobyerno. Pero wala'y Kasulatan ang miingon nga mao kadto ang pagabuhaton Niya. Miadto Siya nga usa ka Propeta. Moabot pa lang, ang Iyang pagka-Hari. Pero gikinahanglan nga Propeta una Siya niadtong panahona, ug gibuhat Niya ang ilhanan nga giingon sa Dios nga pagabuhaton Niya sa maong panahon mismo, ug bisan pa niana gusto gihapon nila nga magbuhat Siya og ilhanan nga subay sa ilang gusto. Kita n'yo?

<sup>111</sup> Ug nahunahuna ko kung dili kaha kita nagapaabot alang sa butang ngadto pa sa palaabuton nga ania ra man diay mismo sa tupad na nato. Nahunahuna ko kung maparehas pud niana, nga mapalagpas nato ang atong oportunidad? Hinumdumi, sama sa kaniadtong mga tipo, dili gayud mapakyas ang mga tipo. Ang kaulahiing ilhanan, sumala kang Jesus, ang giingon Niya, "Maingon sa nahitabo kaniadto sa mga adlaw sa Sodoma, maingon man usab kini sa adlaw sa Anak sa tawo," dili Anak sa Dios ha, "sa diha nga gipadayag na ang Anak sa tawo." Tan-awa dinhi nga nagakahanabo na kini karon! Mga higala, may mga butang ako nga isulti ko dinhi sa inyo nga dili unta angay nga isulti ko sa inyo, pero makurat kamo niini.

<sup>112</sup> Gusto kong mangutana sa inyo og gamay'ng pangutana samtang mohunong sa ta, sa dili pa nato ipapadayon kining panerbisyo, sa pipila lang ka minuto. Nahunahuna ko nga kung mahimo ko bang ipangutana kini sa inyo.

<sup>113</sup> Kabalo tanan nga ang kalibutan, nakaposisyon na, nga ang tanang butang nakahan-ay na para sa Iyang Pag-anhi. "Mga linog sa nagkalainlaing mga dapit; ang bulan nagabuga og pulang dugo, o ginapalibutan na og mapulang pita gikan sa bulkan, nga nagatabon niini," sama sa giingon ni Jesus nga

bantayan n'yo kana nga ilhanan sa kaulahiang mga adlaw; “ang dagat magadaguok, mangaluya ang kasingkasing sa mga tawo, panagkalibog sa panahon, kagul-anan taliwala sa mga nasud.”

<sup>114</sup> Tan-awa n'yo ang pagdaghan sa mga kahiwian karon! Tan-awa ninyo kini karon, kuwarenta porsiyento ang gitaas sa California, sa mga bayot, nawala na ang natural nga pagbati.

<sup>115</sup> Tan-awa pa ninyo. . . Tan-awa n'yo sa karon, kung unsa nga ang mga tawo nagpapabilin na lang sa balay, nga nanagpatawag sa ilang mga kaugalingon nga mga Cristohanon kono, ug naminaw naman hinoon sa mga personalidad sama nila Pat Boone, Elvis Presley, Ernie Ford, ug sila nga mga nanag-awit sa mga himno matag Dominggo; ug motan-aw sila niining mga butang, nga makita kini silang nagapakighalok sa mga kababayen-an, ug kung unsa pang butang nga anaa niana.

<sup>116</sup> Sa dihang, wala'y lalaki ang puedeng mohalok sa babaye hangtud nga siya gipakasal na ngadto sa maong babaye. Tungod sa hinungdan nga magtagbo ang glandula sa lalaki ug babaye. Isulti na nila ang gusto nilang isulti, pero sayup gyud kana. Sa potensyal usa na kana ka pagpakighilawas. Sa dihang magtagbo ang glandula sa lalaki ug babaye, usa na kini ka pagpakighilawas. Ug gihimo na nga. . . Ang lalaki nga nakighalok sa usa pa ka lalaki, magpasuka unta kini kaniya, o sa usa ka babayeng kaparehang babaye. Unsa ang kalainan? Usa na—usa na man gud kana ka pagpakighilawas, halos. Husto kana. Usa ka tipo ni Cristo nga gihagkan ang Iyang Pangasaw-onon, kita n'yo. Dili n'yo angay buhaton kana.

<sup>117</sup> Pero tan-awa n'yo kini sa karon, ang tanan niining mga salida ug mga ingon nianang butang, ug nahimo nang usa ka dakung pundok sa mga paghalokanay ug gakusay. Ug sa tinuod usa na kini ka halos dayag na nga pagpanapaw mismo, sa bisan asa na lang, ug pagkabuta kaayo sa mga tawo nga dili man lang nila makita kini. Husto! Ang tanan anaa na sa kahimtang sa Sodoma, bisan asang lugar nagkatag na ang mga Sodomahon, sumala mismo sa giingon sa Biblia.

<sup>118</sup> Daghan pa kaayong mga butang, tan-awa n'yo sa niining kaulahiang mga adlaw, kung unsa ang giingon Niya nga mamahitabo! Tan-awa ang mga saad nga gikasaad Niya, nga mamahitabo niining panahona. Ug dayon susiha ninyo kini, kung unsa na ang nagakahitabo sa palibot, ug tan-awa kung asa na kita karon, dayon makita ninyo kung Siya ba anaa pa ba gihapon sa Pulong Niya o wala na.

<sup>119</sup> Gusto nilang makita kadtong ilhanan ni Moises, kadtong ilhanan ni David. Dili man kadto para sa ilang kapanahonan; gisaad man kadto para lang sa kapanahonan ni Moises ug sa uban pa nga kapanahonan kaniadto. Ang gisaad para sa niining kapanahonan mao'y kinahanglan nga mamahinabo. Klarong-klaro nga gipakita na Niya kini ngadto kanila, Siya mismo, gamit

ang Kasulatan, ug gidapit sila nga susihon ang Kasulatan, para makita nila kung unsa na bang panahon ang ilang gikinabuhian.

<sup>120</sup> Ingon niana pud ang ginabuhat Niya karon! Susiha ninyo ang Kasulatan, kamo nga nanagpanoo sa Biblia. Kung unsa ang angay nang mahinabo mismo sa karon sa dili pa ang Iyang Pag-anhi?

<sup>121</sup> Tan-awa ang kalibutan, sa kahimtang niini; karon, kining kalibutan. Tan-awa pud ninyo ang kaiglesiahan, kung asa na kini. Tan-awa kung asa na kini karon, “nagasupak na, dagaang na, Laodicea, ginapagawas na ang mismong Pulong.” Ang tibuk butang nagapadulong na ngadto sa dakung konseho sa mga kaiglesiahan, ang World Council of Churches, nga ginaporma na ang marka sa mapintas nga mananap; nga ginapahayag sa Biblia nga sayup gayud, ug ang tanan nianang mga butang, ug bisan pa niana dire-diretso ang mga Protestante nagakahulog ngadto niini, una ang ulo, nga wala nahibalo sa mga Kasulatan. Tungod sa ilang tradisyon! Oh, ang tinguha man gud nila maoy usa—usa—usa—usa ka pinakagamhanang lider, ug makab-ot mismo nila kini. Siguradohon nila nga makab-ot nili kini.

<sup>122</sup> Siya, tan-awa ninyo, pero si Jesus hingpit na Niyang gipaila ang Iyang Kaugalingon kung Kinsa Siya, ug gipamatud-an mismo kanila kung Kinsa Siya, sa Iyang kapanahonan.

<sup>123</sup> Ug ingon niana pud kini sa karon! Karon tan-awa ninyo, kuhaon nato ang panghitabo kaniadto sa Lucas 17, “Maingon sa nahitabo kaniadto sa mga adlaw sa Sodoma.” Tan-awa ninyo ang kalibutan, tan-awa ang iglesia, usa na ka Sodomanhong kahimtang! Tan-awa asa si Lot kaniadto; sa dihang ang mga kalalaken-an nga atua sa gawas namugos nga—namugos nga makasulod sa pultahan, para makuha nila ang mga anghel nga atua didto, kadtong mga lalaki.

<sup>124</sup> Matikdi, tan-awa dinhi. Kanunay adunay. . . Tan-awa ninyo, atua si Abraham kaniadto sa bukid. Wala siya sa Sodoma. Usa kini ka tipo.

<sup>125</sup> Kanunay’ng adunay tulo ka matang sa mga tawo sa usa ka pangrelihiyon nga panagtigum; mga magtotoo, mga nagapatootoo, ug mga dili-magtotoo. Kanunay’ng tulo kana! Ug atua sila didto; atua ang mga Sodomanhon nga dili-magtotoo, ang nagapatootoo nga si Lot, ug si Abraham nga mao ang pinili nga iglesia.

<sup>126</sup> Karon, bantayi ninyo ang ilang mga mensahero niadtong panahona. Duha ka mensahero ang milugsong didto ug nagwali ngadto sa Sodoma. Wala sila nagpakita og unsa man nga mga milagro, gipangbutahan lang nila ang mga tawo didto. Ingon niana man gud ang ginabuhat sa pagwali sa Pulong.

<sup>127</sup> Pero bantayi kung unsa nga matang sa milagro ang gipakita sa Anghel nga atua nagpabilin uban kang Abraham. Nakatalikod Mismo Siya. Ug gisulti kang Abraham nga ang iya

mismong ngalan gibag-o na; tawgon na siyang “Abraham” imbes nga Abram. Dili man siya makabaton og anak gawas nga bagohon una ang iyang ngalan, og mao pud si Sarah. Gisulti Niya sa ila kung unsa na ang ilang ngalan. Gisulti kadto sa Anghel kanila. Ug giingon Niya nga pagaduawon Niya si Sarah sumala sa panahon sa kinabuhi.

<sup>128</sup> Ug mikatawa si Sarah bahin niini. Ug sa dihang mikatawa si Sarah. . . Ang Lalaki nga nakatalikod, ang maong Lalaki nga mikaon og karne sa baka, ug miinom sa gatas gikan sa baka, ug mikaon sa tinapay; kadtong Lalaki, nga puno og abog ang Iyang mga bisti, usa ka magpapanaw, ang Dios Mismo kadto. Ug naila kadto ni Abraham tungod kay nahibalo Siya sa mga hunahuna nga atua sa kasingkasing ni Sarah nga anaa lang sa luyo Niini. Miingon, “Nganong nagaingon man si Sarah sa iyang kaugalingon, ‘Unsaon man pagkahitabo niining mga butanga?’ Aduna ba’y butang nga malisud sa Dios?” Kita n’yo? Ug migawas dayon si Sarah ug gipanghimakak kadto. Miingon Siya, “Oo, gisulti mo mismo.” Karon, mismo niadtong tungora puede Niyang kuhaon ang kinabuhi ni Sarah, tungod sa iyang dili-pagtoo, pero, nakita n’yo, kabahin man gud siya ni Abraham.

<sup>129</sup> Ug bisan kining dili pud nato pagtoo sa Iyang dakung kapadayagan niining taknaa; mga kabahin man kita ni Cristo. Iya lamang, kita n’yo, kita’y—kita’y, kita n’yo, ang atong. . . Iyang—kinahanglan Niyang tumanon kana.

<sup>130</sup> Karon, matikdi, wala pa og ingon niini sa tibuok kasaysayan sa kapanahonan sa iglesia. . . Ug may kaila akong usa ka makugi nga magtutuon nga nakaestorya ko bahin niining butanga, usa ka magsasaysay. Wala pa kono sukad nagkaaduna og ingon niini. Hangyoon ko ang matag magtutuon sa Biblia nga magsulti sa ako kung duna ba’y usa ka tawo nga gisugo ngadto sa kapanahonan sa iglesia, sa niining iglesia sukad niadtong gilansang si Cristo sa krus, nga may pangtibuok-kalibutan nga ministerio, nga ang iyang ngalan naghinapos sa h-a-m, sama sa A-b-r-a-h-a-m, di ba karon lang. Sankey, Finney, Moody, Knox, Calvin; pero nagkaaduna na ba og G-r-a-h-a-m sukad kaniadto, Billy Graham, usa ka bantugan nga ebanghelista nga atua sa mga denominasyon nga anaa sa Sodoma? Wala pa gyud. May usa pud ka Oral Roberts sa karon nga panahon nga atua sa mga Pentecostal, nga ingon niana pud. Kabalo ba mo niana?

<sup>131</sup> Pero, h-a-m! Karon, G-r-a-h-a-m mao’y unom lamang ka letra, pero ang A-b-r-a-h-a-m mao’y pito ka letra. Ang unom mao’y numero sa tawo, organisasyon sa tawo, kahimoan sa tawo; pero ang A-b-r-a-h-a-m mao’y pito ka letra. Karon matikdi, sa Iglesiang pinili nga gipagawas na, dili kadtong mga denominasyon, kondili ang nagabarug nga Piniling iglesia, aduna siya’y mensahero, usab, sa niining ulahing mga adlaw.



132 Unsa na ba ang nagakahitabo didto sa ubos? Unsa man pud ang nagakahitabo dinhi sa itaas? Ikumpara n'yo kini sa kung unsa ang giingon ni Jesus. Wala pa sukad sa kasaysayan nga nagkaingon niini ang kahimtang. Ug ang mao ra nga mga ilhanan nga nagakahitabo usab! Dili pa ba ninyo maamgo, mga higala, ug maila nga kini na mismo ang Dios nga nanaug sa Ebanghelyo, sa Iyang mga katawhan, nga ginapaila ang Iyang Kaugalingon? Dili ba ninyo maila ang oras nga atong gikinabuhian karon? Miabot na ba kita sa punto nga matagbaw na kita sa diyutay'ng mga pagpakpak og mga kamot, makatukar og piyano, ug makasaulo *niini*, ug—ug napahilayo gihapon sa Pulong, hangtud nga buta na kita ngadto niini? Siguradong dili kita ingon niana. Ilhon gyud nato ang oras nga atong gikinabuhian.

133 Si Pedro, si Nathan, o si Natanael, diay, ug ang babaye, nailhan nila kini. Sila, ilang—ilang naila ang Iyang ilhanan, ang ilhanan nga pagka-Mesias.

134 Mao pud karon sa niining mga butang nga ginaingon ko. Dayon sa niining kapanahonan, ang giingon ni Jesus. . . Karon bantayi, may ginapahinungod Siya dinhi karon, ginasulti kanila ang mahitungod sa usa ka kapanahonan. Ang Dios, sa unsa mang kapanahonan, sa dihang magpadala Siya og Iyang Mensahe, nga mao ang Iyang Pulong, ug ginapaila Kini uban nianang kapanahonan; ang mga tawo nga mitoo niini, kini mao'y usa ka halangdong panahon para kanila; sa mga tawo pud nga wala mitoo Niini, mipaingon sa dakung kagubot. Ingon na gyud niana sa una pa.

135 Sama sa mga adlaw ni Jesus, ingon niana pud kini. Bantayi ninyo Siya nga nagatindog dinhi karon. Ang ingon Niya, “Maingon sa nahitabo kaniadto sa mga adlaw ni Jonas, sa Jonah; kay maingon nga si Jonah atua sa sulod sa tiyan sa balyena, tulo ka adlaw ug gabii, kinahanglan ingon niana usab ang Anak sa tawo.”

136 Ingon Niya, “Usa ka dautan ug mananapaw nga kaliwatan magapangita og usa ka ilhanan.” Karon kabalo ba mo kung unsa sa hunahuna ko ang ginabuhat Niya? Siya nagapropesiya, “Usa ka dautan ug mananapaw nga kaliwatan.”

137 Nahunahuna ko kung aduna pa ba'y tawong anaa sa iyang hustong panghunahuna ang maglimod nga wala pa kita sa usa ka mahuyang ug usa ka mananapaw nga kaliwatan, nga ania na mismo ang mga bayot, mga kahiwian! Ug ang porsiyento sa panagbulag sa Amerika mas mataas pa kay sa ubang nasud sa kalibutan. Ug ang tibuok kalibutan miabot na sa kagubot tungod niini. Tulo sa upat, halos, diborsyado; halos, ginabago ang tanan human sa napulo ka tuig nga kaminyoon. Kita n'yo? Pamalandunga ninyo kana! Makigbulag, mangasawa'g utro ug mangasawa'g utro, makigbulag ug mangasawa'g utro.

“Nanagpangaon sila, nanagpanginum, nanagpangasawa ug nanagpamana.” Tan-awa ang oras nga atong gikinabuhian. Aduna ba’y ubang panahon nga mas magubot pa kay niini?

<sup>138</sup> “Usa ka dautann ug usa ka mananapaw nga kaliwatan magapangita sa usa ka ilhanan, matikdi, ug makadawat sila og usa ka ilhanan.” Unsa? Kini nga kaliwatan. “Kay maingon nga si Jonas diha sa sulod sa tiyan sa balyena, tulo ka adlaw ug mga gabii, ang Anak sa tawo kinahanglan maanaa sa ilalum sa yuta nga tulo ka adlaw ug mga gabii.” Unsa man nga ilhanan ang pagadawaton sa niining dautan ug mananapaw nga kaliwatan? Ang ilhanan sa pagkabanhaw.

<sup>139</sup> Ug hangtud karon, human ang duha ka libong tuig, makita gihapon nato si Jesus Cristo diha sa gahum sa Iyang pagkabanhaw, nagatindog mismo sa atong taliwala, nga ginabuhat ang mao rang mga butang nga gibuhat Niya kaniadto ug gisaad nga pagabuhaton. “Usa ka dautan ug mananapaw nga kaliwatan magapangita og usa ka ilhanan, nanagtinguha sa kanunay nga ‘ipakita *kini* kanako, ug kung mabuhat mo ang *ingon niini* ug mabuhat mo ang *ingon niana*.’ Madawat nila kini, ang ilhanan sa pagkabanhaw.” Siya mao sa gihapon kagahapon, karon, ug sa kahangturan; ang Pulong na napadayag, nga nagaipon sa atong taliwala. Pasalamatnan gayud nato ang Dios tungod sa Iyang halangdon nga ilhanan!

<sup>140</sup> Matikdi aduna pa Siya’y gipahanungdan dinha. Giingon Niya, “Ug ang rayna sa habagatan mobangon,” mao kana ang rayna sa Sheba. Paminaw og ayo.

*Ang rayna sa habagatan mobangon ra unya sa adlaw sa paghukom uban niining kaliwatana, ug magahukom niini sa silot: kay siya mianhi gikan sa kinatumyang bahin sa yuta aron sa pagpatalinghug sa kaalam ni Solomon; ug, tan-awa, ania dinhi karon ang labaw pa kay kang Solomon.*

<sup>141</sup> Matikdi, tutokan nato og ayo kining butanga, sa pipila lang ka minuto. Ginabasa Niya ang mao rang Biblia nga ginabasa nato, bahin kang Jonah, ug ania pud ginabasa Niya ang bahin kang Solomon. Karon, sa dihang miabot kaniadto ang kapanahonan ni Solomon, aduna siya’y . . . aduna siya’y gasa sa pagpang-ila. Ug ang tanang tawo, ang tibuok nasud, mitoo niini. Ang tanan usa ra ang kasingkasing ug nagkahiusa. Ang tanan mitoo niini.

<sup>142</sup> Kung ang tanan, karong gabii, kung ang tibuok Amerika, mamalik lamang sa Dios ug motoo sa Dios, kini mao’y pinakamaayong kasiguradohan nga maangkon nato, nga mas labaw pa kaysa tanang kapasilongan kontra sa bomba ug tanang uban pa.

<sup>143</sup> Wala ni usa ang puedeng magbinuang kang Solomon. Nahadlok sila kaniya tungod kay usa siya ka tawong gigasahan.

Ug mitoo sa iya ang mga tawo, nga siya pinadala sa Dios, hangtud nga gihimo nila siya nga ilang hari. Gikahadlok sila sa tanang kanasuran; dili tungod sa ilang mga puwersa pangmilitar, kondili tungod sa Dios nga nag-uban kanila.

<sup>144</sup> Ug kung kining nasud nga nagaangkon nga Cristohanon, kung mahimo lang unta niini, nga ang tanan maghiniusa, manggunit og ayo sa niining halangdong gasa nga gihatag kanato sa ulahing mga adlaw, ang mismong Balaang Espiritu sa Dios nga anaa sa Iglesia. Dili ang kredo. Ang Espiritu sa Dios! “Dili pinaagi sa gahum, ni pinaagi sa kusog, kondili pinaagi sa Akong Espiritu,” ang giingon sa Dios. Ang Balaang Espiritu, si Jesus Cristo sa porma nga Espiritu, anaa kanato, “ang mao ra sa gihapton kagahapon, karon, ug hangtud sa kahangturan,” nga ginahimo kining Pulong nga buhi nga kunsu unsa ang Iyang gisulti buhaton gyud Niini. Bantayi n’yo og ayo karon.

<sup>145</sup> Oh, ang maong balita mikaylap sa tibuok kalibutan! Wala pa sila kaniadto og telebisyon ug radyo, ug ingon-anang mga butang sa ilang mga panahon, busa mikaylap lamang kadto pinaagi sa sulti sa baba nga madungog sa dalunggan. Ug wala magdugay ang dagkung mga karaban nangabot latas niadtong Disyerto sa Sahara, nga nagkinahanglan og tulo-kabulan nga pagbiyahe gikan sa Palestina padulong sa gipuy-an niya. Ug ang pagtoo nagaabot pinaagi sa (unsa?) pagpatalinghug, pagpatalinghug sa Pulong sa Dios. Ug nadungog niya ang mahitungod sa dakung panagtigum nga atua didto sa halayong lugar nga gikapahigayon nila, ug pag may karaban nga nagagikan niadtong lugara, pangutan-on gyud niya, “Gikan ba kamo, gikan ba kamo sa Palestina?”

“Oo.”

“Oh, unsa ma’y masulti ninyo didto?”

<sup>146</sup> “Oh, kini’y—labaw pa kini sa unsa mang butang! Wala ka’y makita og ingon niadto ka grabe nga pagpang-ila. Ug daw sama sa usa ka dios ang nagalingkod didto. Ang ilang Dios girepresentar sa usa ka tawo nga ginganlan og Solomon.”

<sup>147</sup> Bueno, “ang pagtoo nagaabot pinaagi sa pagpatalinghug.” Ang kasingkasing sa rayna nagsugod nga mangandoy nga adtoon kadtong lugara ug susihon ang mahitungod niadto. Kita n’yo, gikatagana nang daan siya ngadto sa Kinabuhi.

<sup>148</sup> Matikdi karon, ang unang butang karon nga buhaton niya, ingon nga usa siya ka pagano, kinahanglan niya nga makuha una ang permiso gikan sa iyang saserdote, para makaadto na. Busa mapamalandong ko nga makita siyang miadto sa iyang saserdote, ug miingon, “Santo padre, nakadungog ko nga may dakung rebaybal nga ilang gipahigayon didto sa—sa Palestina. Mangayo unta ko og permiso nga makaadto didto ug aron nga makita ko mismo.”

149 “Karon, anak ko, abe nimo dili mo kinahanglan makigsagol sa ingon nianang klase sa... Labot pa niana, wala kita’y pagpakighiusa nianang rebaybal, mao nga ikaw—dili ka puedeng moadto. Kita mo, wala kana’y pulos nga pundok. Wala—wala ka’y makuha bisan unsa man niana. Kana sila nga mga tawo nanag-angkon nga gitabok kono nila ang Dagat nga Pula, ug nabuhat pa gyud kono nila kadtong ingon *niini*, *niana*. Wala kana’y pulos. Kung may ingon niana man nga butang nga nagakahitabo, dinhi ra gyud kana mahitabo sa atong iglesia.” Aduna sa gihapon kita og mga pagano.

150 Hinoon nakita nato dinhi nga nagsugod na siyang magutom. Miingon ang rayna, “Pero tan-awa,” ang ingon niya, “gitaho nila sa ako, nga, ‘Ang Dios nila didto girepresentar sa usa ka tawo, ug ang iyang kaalam labaw pa sa unsa mang butang. Ang iyang espirituhanong pagpang-ila kahibulongan.’”

“Oh, wala’y ingon nianang butang.”

Miingon ang rayna, “Pero basin puede akong—akong . . .”

151 “Bueno, tan-awa, usa ikaw ka rayna, dili ka puedeng makig-uban sa mga tawong ingon niana. Kana’y, dili mo puedeng basta buhaton na lang kana. Kana nga pundok sa mga tawo, inila sa tibuok kalibutan nga mga panatiko sa relihiyon. Dili ka puedeng makig-uban niana.”

152 Pero, nakita n’yo, sa dihang ang Dios na mismo ang manginlabut sa kasingkasing sa tawo, walay bisan unsa man ang makapugong niini. Ang bana man, asawa man, mga anak man, ang pastor man, wala na’y unsa mang makapugong niini sa dihang ang tawo tinuoray nga gigutom sa Dios. Siguradong moadto gyud sila, bisan unsa pa. Busa miandam na siya, para makapangandam.

153 Gani, moingon ang saserdote, “Bueno, pahamtangan ko ikaw og . . . Akong—mapugos kong palagputon ka gikan sa atong pagpakig-fellowship.”

154 “Bueno, buhata ang mahimo mong buhaton. Moadto gihapon ko, bisan unsa’y mahitabo. Hibaloon ko mismo sa akong kaugalingon kung bahin sa unsa ba ang tanan niini, ug tanawon ko.”

155 Nagdala siya og mga basahong linukot ug nabasa niya kung unsa ba gyud si Jehovah, nabasa niya ang mahitungod sa Iyang mga propeta ug kung unsa ba ang kinahanglan buhaton niini, kung unsa nga ginapadayag mismo sa Pulong sa Dios, kung unsa nga maila Niini ang mga butang sa dihang girepresentar na kini, pagmitago na Kini sa tawhanong unod, kung unsa ba’y buhaton niini. Ug nabasa niya ang tanan niining mga butanga.

Busa madungog ko kadtong saserdote nga nagaingon, “Bueno, tan-awa gani, *kini* man ang ginaingon sa atong libro,” ingon niya.

<sup>156</sup> “Lagi pero, tan-awa, ang akong...ang akong apohang-apohang-babaye nagsige tindog kaniadto atubangan niining mao rang mga dios-dios. Nagtindog siya didto ug nagapangadye, sa matag adlaw. Wala ni usa man lang ka lihok ang nahitabo, ni usa ka hagawhaw, o bisan unsa man. Ug gikapoy na ako, niining daang patay na nga seremonya. Gusto kong moadto og tan-awon kung may buhi ba gyud nga Dios.” Masubo lang hunahunaon nga wala na kita og ingon niana ka daghang mga rayna karon.

<sup>157</sup> Busa nangandam na siya nga mogikan. Karon sa dihang miabot na siya sa punto nga kinahanglan na niyang molakaw, karon, hinumdumi, nag-atubang siya og grabeng kakulian. Dili kadto ingon ka sayon sa hunahuna ninyo. Karon matikdi ninyo kung unsa ang mga kinahanglan niyang buhaton.

<sup>158</sup> Ania ang usa pa ka butang nga gusto ko gayud, nga dili ko gustong mapalagpas. Gisulti niya kini, “Moadto ako didto, ug magdala ako og kuwarta. Magdala ko og mga gasa. Ug kung kamatuoran gyud kini, suportahan ko kini. Kung dili kini kamatuoran, nan mahimong dalhon ko balik ang akong kuwarta.”

<sup>159</sup> Puede diay tudloan niining bayhana ang mga Pentecostal. Oo, sir. Ang ginasuportahan hinoon ninyo ang mga butang nga ginakataw-an ug ginabiyaybiayan kining Langitnong pagpang-ayo, ug mas suportahan pa ninyo ang mga programa sa radyo imbis ang inyong kaugalingong simbahan, husto kana, nga ginakataw-an ug ginabiyaybiayan ang mismong mga butang nga gitoohan ninyo.

<sup>160</sup> Pero ang rayna miingon, “Dalhon ko kini. Ug kung dili kadto husto, mahimo kong dalhon kini og balik.”

<sup>161</sup> Karon hinumdumi, daladala niya ang tanang bahandi nga sakay didto, ibabaw niadtong mga kamelyo. Ug karon hinumdumi, ang panon sa mga mangangabayo ni Ismael nga mga tulisan didto baya sa disyerto, atua mismo sa palibot didto. Sayon ra kaayo para kanila nga ambuson kining—kining ilang mabiktama, ug, aba, mahimong mapatay pa sa maong mga tulisan kining pipila ka mga eunoco nga kauban sa rayna, ug agawon kadtong kuwarta ug manggilayay sa gilayon.

<sup>162</sup> Pero may sa kung unsa gyud nga butang mahitungod niini, pag ikaw determinado gayud, ug ang Dios na mismo ang nagapadayag sa Iyang Kaugalingon, nga kung determinado ka nga makita si Cristo, walay bisan unsa man nga peligro sa unahan nimo. Wala mo na gani kana ginatagad! Mahimong moingon ang doktor nga mamatay ka na, dili mo na gani kana mamatikdan. Pagmanglimbasog ka, kabalo ka nga aduna gyu’y sa kung unsang butang dinha.

<sup>163</sup> May sa kung unsang butang sulod sa kasingkasing sa rayna, nga nagdilaab, pagtoo sa niining Dios! [Blangko nga bahin sa

teyp—Ed.] . . . tulo ka bulan para matabok kadtong Disyerto sa Sahara. Nga dili sakay sa usa ka de-aircon nga Cadillac. Dili, dili. Miabot og tulo ka bulan ang pagtabok niya sa Disyerto sa Sahara, siguro nagabiyaha siya bisan gabii, nagabasa sa mga basahong linukot, sa uwasis pag adlaw, hangtud nga nakaabot siya.

<sup>164</sup> Karon, dili ikatingala nga giingon ni Jesus nga ang maong rayna motindog sa ulahing mga adlaw ug pagahukman kining kaliwatan, tungod kay ang uban kanila ayaw motabok nga tabok-kalsada na man lang unta; ug ang labaw pa kang Solomon ania mismo karon, ang Balaang Espiritu Mismo. Kita n'yo? Dili ikatingala nga mobangon siya sa ulahing mga adlaw ug pagahukman kining kaliwatan!

<sup>165</sup> Bantayi, sa katapusan nakaabot gyud siya. Wala siya miabot didto nga sama sa daghang mga tawo, pag bag-o pa lang sila motambong sa panagtigum. Miabot siya didto ug daladala niya ang mga kamelyo, ug miadto didto sa nataran, nagpatindog sa iyang mga tolda, ug may tuyo nga magpabilin niadtong lugara hangtud nga makumbinsi siya.

<sup>166</sup> Kadaghanan sa mga tawo ang magtambong lang, maglingkod siguro mga lima ka minuto, siguro baynte-singko. Dayon pag ang ebangelista o ang magwawali may masulti nga sa iyang—sa tan-aw niya'y supak sa ginaingon sa iyang kredo, o iyang, iyang kredo, manggawas dayon sila. Kita n'yo, bisan respeto na lang unta. Mao nga dili ikatingala nga pagahukman sa niining rayna kining kaliwatan; miadto man gani siya para magpabilin hangtud nga makumbinsi.

<sup>167</sup> Akong mapamalandong ang unang panerbisyo nianang buntaga, sa dihang mibudyong ang tanang trumpeta, og migawas si Pastor Solomon. Mahimong ang rayna nagalingkod didto sa pinaka-likod. Miingon siya, “Karon masaksihan ko na gyud kini mismo. Kabalo ko nga ingon niana kinahanglan si Jehovah. Puede man kini angkonon ni kinsa man, pero hibaloon ko gyud.” Busa naglingkod siya didto niadtong adlaw ug gipangsud-ong niya, ug nakita niya ang matag tawong miduol didto sa entablado. Nakita niya kadtong pagpang-ila wala gyu'y sayup.

<sup>168</sup> Sa katapusan, ingnon na lang nato nga natawag ang iyang prayer kard, nga mahimong wala pud natawag, pero miabot gyud ang iyang kahigayonan nga makaatubang kang Solomon. Ug ang giingon sa Biblia, nga, “Sa dihang atua na siya nagatindog sa atubangan ni Solomon, gipahibalo sa Dios kang Solomon ang tanan niyang mga sekreto. Wala gyu'y butang nga natago.” Dayon nahitabo mismo kaniya ang milagro.

<sup>169</sup> Dayon giatubang niya ang mga mananambong, ug miingon siya, “Ang tanan niining mga butang nga akong nadungog tinuod gayud, ug labaw pa gani kay sa mga nadungog ko bahin niini.”

Kita n'yo? Oh, nakuyapan siya, nalipong, tungod nga ania ang usa ka lalaki nga wala gani makaila kaniya, usa ka estranghero, gipadayag ang mga butang nga gusto niyang mahibaloan.

<sup>170</sup> Oh, ug atua si Jesus, nga mas labaw pa kay sa kang Solomon! Siya ang bug-os kinatibuk-an sa pagka-Dios diha sa pagkalawas. Siya ang Anak sa Dios nga gipanganak sa usa ka ulay. Gisul-ob Niya Siya, ug si Jehovah Mismo nga napadayag diha sa unod. Ug ania Siya nagtindog didto diha sa kahupnganan, ug nanag-ingon ang mga tawo nga dili sila motoo Kaniya, sa usa ka halangdong espirituhanong pagpang-ila. Kita n'yo, Siya si Solomon nga gidugang si David, nga gidugang silang tanang uban pa nga silang tanan atua sulod Kaniya. Tanan silang mga propeta gihiusa diha Kaniya, usa ka labaw pa kay kang Solomon.

<sup>171</sup> Ug bisan niadtong adlaw, miingon Siya, “Kung isulti ninyo kanang mga pulong batok Kanako, pasayloon Ko kamo. Pero sa dihang moabot ang Espiritu Santo, mamahimong mas labaw pa kini kay sa karon, ug dugang pa nga pagkahinukman sa silot.”

<sup>172</sup> Ug ania kita nagatindog karon nga nasaksihan ang mao mismong Dios nga ginabuhat ang mao mismong mga butang! Nagatoo ako nga mobangon ang maong rayna sa Adlaw sa Paghukom ug pagahukman sa silot kining kaliwatan, tungod kay siya naghinulsol ug mitoo sa mensahe nga giwali kaniadto ni Solomon, ug mitoo sa Dios. May tinuod nga butang siyang nakita.

<sup>173</sup> Kabalo mo, unsa ma'y problema sa panahon karon, may mga tawong, daghang mga tawo, mga tawong nagapasakop lang ug nagasimba-simba ug kredo ang ginatooan. Kita n'yo, mga tawong namatuto na sa ingon ka daghang mga bakak, ingon na ka daghang rebulto, ug sa ingon ka maanindot nga dagkung mga bilding. Ug—ug, kita, dili gyud kita—dili gyud kita magpadani sa ingon nianang mga kapritso. Kita n'yo, ang Dios wala nagapuyo sa dagkung mga bilding; nagapuyo Siya sulod sa inyong kasingkasing. Kita n'yo, ang Dios wala nagapuyo sa intelektuwal nga edukasyon; Halayo kaayo Siya niana. Nagapuyo Siya diha sa kamapaubsanon, sa inyong kasingkasing.

<sup>174</sup> Nagapuyo Siya diha sa Iyang Pulong, ug ang Iyang Pulong nagasulod sa inyong kasingkasing ug nagasulti Kini Mismo, ug nagapahayag. Siya mismo ang nagahubad sa Iyang Kaugalingong Pulong pinaagi kanimo. Nagapaninguha Siya nga makakaplag og usa ka tawo nga Iyang mahimong kuptan, para ipakita nga Siya'y Dios sa gihapon. Kita n'yo? Ug Siya mao gayud, Iyang buhaton kana kung makakuha lamang Siya og usa ka tawo nga Iyang masultihan. Kung makakuha lang Siya og usa pa ka babayeng may talinugo, magasulti gihapon Siya sa pareho ra nga pamaagi. Mahimo gihapon Niyang buhaton ang mao rang

butang, nga magpaila, magpahayag. Anaa kita sa Presensiya sa Dios, pero wala nato maila Kini.

<sup>175</sup> May nadumduman akong gamay'ng sugilanon. Siguro nasulti ko na kini sa inyo kausa, wala ko kabalo. Pero may kalabutan kini sa gihisgotan nato karon. Maingon sa inyo nang nahibaloan, ako'y—nagapangayam ko og dagkung mga mananap. Ug atua ako kaniadto sa kakahoyan sa amihanan, nga kanunay kong mosaka didto para mangayam, sa tanang panahon. Ug may higala ako nga atua niadtong lugara nga ang ngalan Bert Call. Usa siya ka hanas nga mangangayam, nga may pagkamestisong Indian. Dili mo na siya kinahanglan nga kabalak-an, dili naman gud siya mahimong mawala sa lugar. Ug suod kaayo kaming higala, pero siya ang pinakasalbahis nga tawo, sa kasingkasing, nga sukad nakita ko. Wala gyud siya'y kaluoy. Naanad na siya nga mamusil og gagmay'ng nating-lagsaw, kanang gagmay'ng mga masusong-lagsaw, para lang nga maguol ako. Ug dayon moingon siya, “Oh, talawan lang gyud kamo nga mga magwawali. Billy, mas mamahimong hanas ka pa gyud nga mangangayam kung dili ka pa lang unta usa ka magwawali.” Miingon, “Sobra ra kaayo ang imong pagkatalawan.”

Ingon ko, “Bert, dili talawan ang tawag niana.”

<sup>176</sup> Karon, okay lang man nga mamusil og nating-lagsaw kung gitugotan pud sa balaod. Nagpatay man si Abraham kaniadto og usa ka nating-baka ug gipakaon kini sa Dios. Wala kini sa kadak-on o kung babaye ba o lalaki.

<sup>177</sup> Kondili ang tuyo nga magmapintas niini, ug nga basta mo na lang pusilon ang mga nating-lagsaw ug kataw-an lang, mokatawa tungod kay maguol man ko tungod niana. Bueno, karon, iyang—iya kadtong binuhatan.

<sup>178</sup> Ug may usa na ka tuig ang pag-adto ko didto. Ug may naimbento siya nga gamay'ng pitohan nga kung hoypon niya, motingog kini og ingon sa usa ka gamay pa nga lagsaw, nga daw sa nagahilak nga nagapanawag, kabalo na mo, para sa mama niini. Ug busa ang ingon niya, “Hoy, Billy, sa dili pa kita mogikan karong buntaga,” miingon, “may gusto kong ipakita sa imo nga usa ka butang nga dala ko.” Ug gipakita niya kadto kanako.

Miingon ko, “Bert, ayaw ingna nga mogamit ka'g ingon niana.”

<sup>179</sup> Ingon niya, “Oh, pagtarong dinha ba.” Ug kini siya may mga mata nga mora og palaos, nga sama niining mga kababayan-an karon nga nagapangpintal sa ilang mga mata, kabalo na mo kung unsa, nga sama niana. Kabalo mo, pagmotan-aw siya sa ako, sa niadtong mga mata niya nga mora'g palaos, ug ang tinan-awan sa mata, halos mahadlok ko.

Ug—ug miingon ko, “Bert, ayaw'g buhata kana.”



Ingon niya, “Oh, talawan gyud mo nga mga magwawali!”

<sup>180</sup> Busa kami—kami’y. . . Medyo nauwahi ako sa pag-abot niadtong higayona. Ug kining kadtong mga lagsaw nga northern whitetail. . . Ang inyong mule nga lagsaw dinhi, molakaw gani paduol nimo, pero dili kadtong mga lagsaw nga atua didto. Sa higayon nga pabuthan siya, siya’y. . . Kanang ginaingon n’yong si Houdini nga hanas sa mga pag-eskapo, siya’y bag-ohan lang, kung itandi kanila. Busa medyo uwahi na ako ug makadaghang higayon na silang napabuthan og pusil. Ug kining nga lagsaw nanagtago didto sa kakahoyan, gapangaon lang sa magabii nga bulanon, ug motulog pag adlaw. Nagbaktas kami hangtud miabot kami didto sa tumoy sa Jefferson Notch, pasaka sa Mount Washington. Didto, mga unom ka pulgada ang kabaga sa niyebe niadto sa yuta, maanindot nga panahon sa pagsubaysubay sa tunob; pero ni usa ka tunob wala’y makita.

Ingon niya, “Unsay tan-aw mo, Billy?”

<sup>181</sup> Miingon ko, “Siguro nahadlok n’yo silang tanan og ayo nga nanggipalayo na hinoon sila dinhi, tungod sa mga machine gun n’yong ginapabuto.”

<sup>182</sup> Ug busa nagpadayon na kami. Pagkataudtaud, mga alas onse na. Kanunay namong dala-dala ang—ang gamay’ng botelyang termos nga may mainit nga tsokolate. Para kini kung masamdan ka, o unsa man, pampalagsik lang kini, ug may tinapay pud nga may palaman. Mao nga sa mga alas onse kadto o alas onse y media, siguro, miabot kami didto sa hawanan nga mga ingon niini dinhi ang gidak-on sa arena, o niining bilding, ug wala kaayo og kahoy didto. Busa medyo napalingkod siya, gisandig ang iyang pusil sa kahoy, may gikuha lang siya sa luyo niya *dinhi*. Ug abi ko nga kuhaon lang niya ang iyang—ang iyang termos. Nahunahuna ko, “Siguro, mangaon na kami.”

<sup>183</sup> Kasagaran man gud mangaon kami pagnakasaka na kami ibabaw sa bukid, ug dayon moadto ang usa kanamo ngadto sa usa ka direksyon ug ang usa ngadto sa usa pa, ug mamalik pagkahuman. Ug sinati na namo ang palibot, og ayo. Ug kung may makuha kaming lagsaw, ibitay namo kadto, ug dumdumon lang namo kung asa kadto gibitay, para adtoon ug tabangan ang usa’g usa aron makuha pud nila ang sa ila. Busa abi ko nga kuhaon lang niya ang iyang paniudto, ug magbuwag na kami, tungod kay halos naabot na namo ang tumoy didto nga wala na kaayong mga kakahoyan. Busa akong. . .

<sup>184</sup> May gikuha siya sa likod. Ug mikuha pud ko sa akong termos, gikuha ko ang akong tsokolate, ug sugdan ko na unta ibubo. Ug gipagawas niya kadtong gamay’ng pitohan gikan sa iyang bulsa, ug gihuyop niya kadto sa makusog nga ingon *niana*. Ug mitan-aw kanako nga ang mga mata niya mora’g palaos na usab, ug gihuyop ang maong pitohan. Ug paghuyop niya, halos

ingon niini lang kalapad sa bilding ang gilay-on, may usa ka dakung bayeng-lagsaw ang mitindog.

<sup>185</sup> Karon kung ang uban sa atong mga igsoong babaye siguro wala pa nahibalo, ang bayeng-lagsaw usa kana ka inahang lagsaw. Ug, kita n'yo, kadtong tingog sa pitohan daw usa ka masusong-lagsaw, nga naghilak, ug kining dakung inayang-lagsaw mitindog didto. Ug mga alas onse mismo kadto sa buntag, og ang si kinsa man nga mangangayam og mga lagsaw kabalo nga dili maayo kana nga oras. Nangahigda sila nianang higayona.

<sup>186</sup> Mao nga mitindog ang inayang-lagsaw ug milantaw sa palibot. Makita ko mismo siya sa ingon gayud ka dayag. Mitantaw sa ako kining akong kauban, ug gihuyop niya pag-usab ang pitohan. Ug imbis nga—nga modagan unta palayo, miadto na hinoon ang inayang-lagsaw didto mismo sa hawanan.

<sup>187</sup> Karon, talagsaon kana. Dili nila batasan nga buhaton kana. Kabalo gyud niana ang si kinsa man mga mangangayam. Ug ayaw sa mga lagsaw kana, ug dili gyud nila kana buhaton. Pero miadto mismo didto kining inayang-lagsaw. Ngano man? Usa man siya ka inahan; tungod usa man kadto ka masusong-lagsaw. Kinaiyanhon kadto, kita n'yo, natawo siyang anaa na kanang kinaiya nga mamahimong usa ka inahan, ug may masuso nga atua didto.

<sup>188</sup> Ug gipunting na ni Bert ang iyang pusil, og gikasa niya kini, gipahimutang kini sa traynta-o-sais. Ug usa mismo siya ka hingigo. Ug nakita ko siya nga miposisyon na nga ingon *niini*, ug kabalo ko nga buskagon gyud niya ngadto sa duha ang matinud-anong kasingkasing niadtong inayang-lagsaw, gamit ang usa ka gatus-og-otsentang-granong, bala nga pormang-uhong. Ug sa hunahuna ko, “Nganong mahimo mo mang buhaton kana, Bert? Pagkadautan man nimo, nga tawagon mong pagawas ang maong lagsaw ug dayon direkta mo siyang pusilon sa kasingkasing, nga nangita lang man siya sa iyang masusong-lagsaw? Pagkamapintas man nimo nga buhaton kana?” Mao kana ang sa hunahuna ko. Ug nakita nako nga giposisyon na niya ang pusil nga ingon *niini*.

<sup>189</sup> Ug dili nako maantus, dili nako maantus nga lantawon kadto. Mapintas kaayo kadto. Siguro talawan lang gyud ko. Mitalikod na lang ko, ug nahunahuna ko, “Dios, nganong mabuhat man niya kini? Nganong aduna ma'y tawo nga ingon niana ka pintas, nga mahimo niyang buhaton kana, nga basta na lang pusilon ang kasingkasing nianang makaluluoyng matinud-anong inahan?”

<sup>190</sup> Karon, wala gayud nagpakaaron-ingnon ang maong inayang-lagsaw. Dili kadto pagpasundayag. Inahan gayud siya. Nakita niya mismo ang mangangayam nga giton na niini ang pusil, pero mikalagiw ba siya? Wala, sir. Tungod sa

hunahuna niya anaa sa peligro ang iyang masusong-lagsaw, ug naningkamot siya nga makita ang iyang masusong-lagsaw.

<sup>191</sup> Ug mitalikod ko, sama sa giingon ko, ug milakaw. Ingon ko, “Ginoong Dios, nganong mahimo man niya kini?” Gibantayan nako, ug naghulat, og naghulat, pero wala’y buto sa pusil.

<sup>192</sup> Ug gilingi nako ug gitan-aw, ug ang pusil nakaposisyon og ingon *niini*. Dili na niya kini diretso maipunting didto. Mitalikod siya, kadtong dagku niyang mga mata nga mora og palaos kalit nausab, may mga luha nga nagadagayday sa iyang aping. Giitsa niya ang pusil ibabaw niadtong bungtod, ug miingon siya, “Billy, ayaw ko na niini. Giyahi ako nianang Jesus nga imong ginawali.”

<sup>193</sup> Ibabaw mismo niadtong bungtod sa niyebe gigiyahan ko siya ngadto kang Cristo. Ngano man? Nakita niya ang usa ka butang nga matuod, nakita niya ang usa ka butang nga tinuod. “Kung sila’y pugngan. . . kung pahilumon sila, mangtuaw mismo ang mga bato.” Ang maong inahan wala gayud nagpakaaron-ingnon. Tinuod gayud siya nga inahan. Bisan pa kung kamatayon na kadto, o unsa man, giatubang niya mismo ang kamatayon, nga nanghibalo nga sa unsa mang minuto moigo ang bala palahos sa iyang kasingkasing, pero gitan-aw niya ang kahilwasan sa iyang anak.

<sup>194</sup> Oh, kung puede lamang nato unta nga mamahimong ingon niana gyud ka Cristohanon sama nianang lagsaw nga inahan! Ngano man? Natawo siya nga usa ka inahan, natawo siya para mahimong usa ka inahan. Natawo kita para motoo sa Pulong sa Dios. Natawo kita para motoo kang Jesus Cristo.

Iduko nato ang atong mga ulo.

<sup>195</sup> Pila ang ania dinhi mismo karon, nga nagpataas sa ilang kamot, ang moingon, “Igsoong Branham, tinuoray gusto kong mamahimong ingon niana nga matang sa Cristohanon sama sa pagka-inahan nianang inayang-lagsaw. Akong—tinguha ko nga ang akong kasingkasing mapuno gayud og Cristo nga mahimo kong moatubang sa unsa mang butang ug mamahimong tinuod nga Cristohanon sama sa kung unsa ang pagkainahan nianang lagsaw. Akong, mao kana nga matang sa kasinatian ang gusto ko”? Mahimo bang ipataas ninyo ang inyong kamot? Ang Dios magapanalangin kanimo. Maayo kana. Ang Dios magapanalangin kanimo. Daghan kaayo, bisan asa na. Mapasalamaton kaayo ko nga kamo aduna pa sa gihapon og igong tinuod nga butang diha sa kinasuloran n’yo nga makapaawhag pa kaninyo nga motoo.

<sup>196</sup> Kita n’yo, unsa na lang kaha kung dili na kamo motoo? Dili ba mamahimo kanang makaluluoy na gayud, nga makita ang usa ka dili-magtotoo sa kahimtang nga ang ilang mga kasingkasing ingon na ka gahi hangtud dili na sila mahimong motoo, hinukman na, napahilayo, nahisalaag, nga wala man lang nahibalo niini, wala mahibalo kung unsang oras nang

manuktok ang kamatayon sa pultahan? Siguradong paingon kamo sa Eternidad.

<sup>197</sup> Ug miingon si Jesus, “Gawas kung ang tawo matawo pag-usab,” nga mamahimong ang iyang pagka-Cristohanon sama gayud sa kung unsa ang pagka-inahan niadtong lagsaw, “dili gayud kamo makakita sa Dios; kamo’y tapus na, bisan unsa pa ka daghan nga mga simbahan ang inyong gipamiyembrohan.” Nakig-estorya si Jesus kaniadto sa usa ka lider sa relihiyon niadtong adlaw, kang Nicodemo, lalaking otsenta anyos ang panuigon, ug gisultihan siya nga kinahanglan siya nga maipanganak, nga kinahanglan niyang mamahimong usa ka matang sa Cristohanon nga sama sa kung unsa ang pagkainahan sa maong lagsaw.

<sup>198</sup> Aduna pa ba nga wala nagpataas sa ilang mga kamot, nga nahibalo gayud sa Presensiya sa Dios, ilhon ninyo Kini ug moingon, “Kabalo ko nga nasayup ako”? Sa dihang maamgo mo nga nasayup ka, ginaila mo ang Presensiya sa Dios.

<sup>199</sup> Pero kung wala ka kabalo nga sayup ka, ang giingon sa Biblia, “Ikaw alaut.” Sa niining kapanahonan, ang iglesia mamahimong “alaut, makaluluoy, kabus, buta, ug hubo, ug wala mahibalo niini.”

<sup>200</sup> Hunahunaa lamang kung ang usa ka lalaki o babaye diha sa dalan, alaut, buta, kabus, makaluluoy, ug hubo, ug masultihan mo sila nga mga hubo sila, ug maminaw sila sa imo, pero unsaon kaha kung mga hubo sila ug dili sila motoo niini? Nan grabe kana nga kahintang sa pangutok!

<sup>201</sup> Bueno, karon, ingon niana mismo ang espirituwal nga kahintang sa karon. Ang mga tawo buta na sa espirituwal, alaut, makaluluoy, hubo sa atubangan sa Dios, mga makasasala nga naningkamot tabonan ang ilang kaugalingon dahong higuera nga mga tabon sa kung unsang denominasyon, ug wala mahibalo niana.

<sup>202</sup> Mahimo ba nga ipataas mo ang imong kamot, aduna pa ba’y uban? Ang Dios magapanalangin kanimo. Husto kana. Ang Ginoo magapanalangin kanimo. Sa dili pa kamo. . . Mahimong bag-ohan ka dinhi, nga wala pa sukad nakakita nga nagabuhat ang Dios og usa ka butang. Pero sa dili pa kamo makakita sa unsa mang butang, kamo, isulti ninyo, “Dawaton ko kini pinasikad sa Pulong. Kabalo ko nga ania mismo ang usa nga labaw pa kang Solomon; ang halangdon nga Balaang Espiritu sa Dios nga ania mismo. Mabati ko Kini. Nagatoo ako Niini. Ipataas nako ang akong kamot. Usa ako ka makasasala; nagapangamuyo ako para sa akong kaluwasan.”

<sup>203</sup> Langitnong Amahan, panalangini kining mga nanagpataas sa ilang mga kamot. Gipangamuyo namo ang Imong kalooy nga maihatag sa mga ania nga—nga mga makasasala. Nga, tingali miyembro sila sa usa ka iglesia. Sila, pero wala kana

nagapasabot nga dili sila mga makasasala. Ug nanagpataas sila sa ilang mga kamot, gusto nilang maluwas. Ginoo, may kung unsang Butang sa ilang tupad. Naila nila ang Balaang Espiritu nga anaa dinha. Ug ilang—ilang naila nga Kini ang Dios, ug nagasulti Kini ngadto kanila, nga, sila nga wala pa og ingon niini nga kasinatian nga kinahanglan magkaaduna sila, ug gipataas nila ang ilang mga kamot.

<sup>204</sup> Miingon Ka, “Siya nga moduol Kanako, dili Ko gayud igasalikway.” Ug kabalo ko nga matuod kana. Miingon Ka, sa San Juan 5:24, “Siya nga nagapatalinghug sa Akong mga Pulong ug nagatoo Kaniya nga nagpadala Kanako, adunay Kinabuhing walay katapusan; dili Pagahukman, hinonoa nabalhin na gikan sa kamatayon ngadto sa Kinabuhi. Ang nagaduol Kanako, pagahatagan Ko siya og Kinabuhing walay katapusan, pagabanhawon siya sa ulahing mga adlaw.” Kana’y Imong mga saad, Amahan.

<sup>205</sup> Akong ginapangayo ang matag usa kanila. Mga Cristohanon tingali ang uban, Ginoo, nga nagapaningkamot sa paglakaw sa kinabuhi, nagapaningkamot nga magkinabuhi og labi pang maayo, sa matag adlaw, ug ilang—gusto nila nga masinati ang—ang—ang maglakaw og labi pa maayo, gipataas nila ang ilang mga kamot, usab. Amahan, nangamuyo ako nga Imo silang panalanginan. Hinaut nga makaplagan nila ang tanang-katagbawan karong gabhiona kang Cristo, ang Pulong nga nahimong unod sa among taliwala. Itugot kini, Ginoo. Akong silang ginatugyan Kanimo, sa Ngalan ni Ginoong Jesus Cristo. Amen.

<sup>206</sup> Ang Dios magapanalangin kaninyo. Ug samtang nagalingkod kamo nga hilum ra gyud, kita n’yo, kadali lang; oh, hala, lagpas na diay ko og lima ka minuto sa oras ko. Pasayloa ko, dili ko tuyo magwali nga ingon kataas. May isulti pa ako kaninyo, antuson lang usa nato kini sa makadiyut, hatagan n’yo pa ako og dugang lima ka minuto kung mahimo.

<sup>207</sup> Pila ang kabalo kung unsa ang Dios? Kabalo kita kung unsa ang giingon sa Biblia kung unsa Siya, ug ang giingon sa Biblia, “Siya mao ra sa gihapon kagahapon, karon, ug hangtud sa kahangturan.” Ug giingon ni Jesus, sa San Juan sa ika-14 nga kapitulo, sa ika-12 nga bersekulo, Miingon Siya, “Ang nagatoo Kanako, ang mga buhat nga Akong ginabuhat pagabuhaton usab niya.” Dili ang mga nagapakaaron-ingnon lang nga nagatoo, kondili, “siya nga nagatoo Kanako.” Tinuod ba kana, igsoon kong mga ministro? Husto kana. Pila ba sa mga nagbasa dinhi sa Biblia ang nakabalo nga mao kana ang tinuod? “Mahanaw man ang langit ug yuta,” pero ang Iyang mga Pulong dili gayud mapakyas. Gisaad Niya kana.

<sup>208</sup> Karon aduna gyud, sa wala’y pagduhaduha, og mga tawong masakiton nga anaa sa inyo dinha. Wala ako makaila sa inyo,

man lang. Ug para mapamatud-an kining akong mga gisulti kaganina, maingon nga ang Manulonda sa Ginoo niadtong mga adlaw nga nangagi, mga panahon nga nangagi, sa nangagi, miingon si Jesus, “Maingon sa nahitabo sa mga adlaw ni Lot, maingon man usab sa pag-abot sa Anak sa tawo.” Makita ba ninyo kung unsa ang akong ginahisgotan, kadtong mahitungod sa mga ngalan ug sa tanang uban pa nga nakaposisyon na, ang iglesia nga nakaposisyon na pud, makita n’yo ba kini? Karon sigurado ko na nasabtan na ninyo kanang mga buut kong ipasabot bisan pa nga wala ko nasulti, nakita n’yo kining buut kong ipasabot. Karon kung kamo nga mga tawo dinhi, nga mga masakiton ug nanginahanglan, akong . . .

<sup>209</sup> Unsa man diay ang tumong kon nganong ania ko karon? Para man diay sa unsa kon nganong nagatindog ako dinhi karon, para bang manlimbong? Kung buhaton ko kana, panahon na para kanako nga . . . ako, dili ko na, dili na ako maninguha nga mabuhi pa. Ako, mas maayo pa nga mamatay na ako. Ako, mas pilion ko na sigurong mogawas ug mamahimong uban na lang kay sa mamahimong usa ka limbongan. Ug unsa na lang kaha ang buhaton sa Dios kanako? Ug wala ko kabalo kung makalahus pa ako nga buhi niining tibuok gabii, og ingon niana pud kamo. Pero ang mamahimong usa ka limbongan, ang gusto nato nga . . . Unsa ba ang punto nga gusto mong mamahimong limbongan, kung puede man ka mamahimong tinuod? Pero, nakita n’yo, talagsaon kaayo Kini para kaninyo.

<sup>210</sup> Karon, tan-awa, kung ginadeklarar ko nga kining mga Kasulatan kinahanglan nga matuman, kining akong mga gibasa ug gipakita sa inyo niining duha ka ulahing mga gabii, kung unsa gayud si Jesus, kung unsa gayud ang Presensiya Niya sa karon! Ug gitoohan nga Siya magabalik sa ulahing mga adlaw, kabalo kita niana, pinaagi sa tawhanong lawas, ug ideklarar ang Iyang Kaugalingon sa ingon niana pud nga paagi. Kabalo kitang tanan niana. Nahibalo ba kita niini? Moingon og “amen” kung ingon niana man. [Nagaingon ang kongregasyon, “Amen.”—Ed.] Sige. Karon para mahupay kamo, ginaingon ko sa inyo, ginaingon ko kini sa inyo, pinasikad sa Iyang Ngalan: Ania Siya karon, ang mao ra nga Dios nga nanaug ug nakigsulti kaniadto kang Abraham, nga Siya nakatalikod sa tolda, ug si Sarah nga atua sulod kaniadto sa tolda, nga nahibaloan Niya ang hunahuna niini.

<sup>211</sup> Ginasulti Niya ang mao gihapong butang pagnagaanhi Siya. Motan-aw Siya sa mga mananambong ug maila Niya kung unsa’y anaa sa sulod sa ilang kasingkasing. May usa ka babaye kaniadto nga mihikap sa Iyang bisti; milingi Siya sa palibot hangtud nga nakita Niya ang maong babaye, ug nagsulti sa babaye.

<sup>212</sup> Ang buta nga si Bartimeo nahikap usab ang Iyang bisti, sa dihang misinggit kini, “Ikaw nga Anak ni David, kaloy-i ako,”

ingon nga kini duha ka gatus ka yarda ang gilay-on kung asa Siya miagi. Ang pagtoo sa niining buta mao'y nagpahunong sa Anak sa Dios, didto sa dalan, ug nga milingi ug miingon, “Dalha siya dinhi.”

<sup>213</sup> Ang gamay nga si Zaqueo didto ibabaw sa kahoy, gitago ang kaugalingon, nag-ingon, nga wala kini nagatoo nga usa Siya ka Propeta, pud. Ug si Jesus miadto, mitindog ilalum mismo sa maong kahoy ug mihangad, ug miingon, “Zaqueo, kanaug,” gitawag siya sa iyang ngalan.

<sup>214</sup> Niadtong panahon nga wala pa nakita ni Jesus si Pedro, ug gidala siya ni Andres didto. Sa dihang nakita siya ni Jesus nga nagasingabot, miingon, “Ang imong ngalan Simon. Ikaw ang anak nga lalaki ni Jonas,” gisulti sa iya ang iyang ngalan, gisulti sa iya kung kinsa siya.

Gisulti pud kang Natanael kung asa siya kaniadto, kung unsa ang gibuhat niya.

<sup>215</sup> Kadtong babaye usab, ug gisulti pud kung unsa ang iyang kahintang, kung unsa ang iyang problema, kung unsa ang iyang sakit.

<sup>216</sup> Ang Dios kana, mga higala! Pila man ang nagatoo niana uban sa tibuok ninyong kasingkasing, moingon, “Ang Dios gyud kana?”

<sup>217</sup> Pila man kaninyo nga ania karon ang kabalo nga wala ako bisan unsang butang nga nasayran bahin sa inyo, ipataas ang inyong kamot, moingon lang, “kabalo ko nga kanang tawhana wala’y hingsayran bahin kanako, usa lang—usa lang siya ka tawo”? Mao kana kung unsa ako, igsoon lang ninyo ako. Ania lang ako nga naningkamot sa pagtabang kaninyo.

<sup>218</sup> Pero akong ideklarar! Pili man ang nakabasa na sa akong libro ug ingon-anang mga butang? Kamo, kabalo mo, nagatoo ba kamo nga kana, ang Kamatuoran? Mao na kini ang ulahing mga adlaw. Ug karon hinaut nga tabangan kita ni Ginoong Jesus.

<sup>219</sup> Ug kung moanhi Siya karong gabhiona . . . Ug ni usa sa inyo dili lang unta magtindog-tindog. Magpabilin lang sa inyong mga lingkoranon kung asa man kamo, ug magtoo, ug ang Ginoong Jesus moanhi karong gabhiona ug pamatud-an kining mga butanga nga Iyang gisulti, kining mga butang nga Iyang gisaad. Kung pamatud-an Niya ang mga niini nga mao gayud ang Kamatuoran, mahimo ba ninyong toohan Siya? [Nagaingon ang kongregasyon, “Amen.”—Ed.] Toohi gayud!

<sup>220</sup> Langitnong Amahan, karon nasulti ko na ang mahitungod Kanim, kung unsa Ikaw kaniadto, kung unsa Ikaw karon, busa mahimo Ka bang moanhi sa among taliwala karon. Ug ang mga tawo nga nagalingkod dinha taliwala sa mga mananambong, nga mga dili ko kaila, mahimo ba Nimo nga ipadayag ang Imong Kaugalingon kanamo niining gabhiona, Ginoo, aron mahibaloan

namo ug maila kining mga Kasulatan natuman, nga “Si Jesus Cristo mao ra sa gihapon kagahapon, karon, ug hangtud sa kahangturan”? Kung ingon-ana nga kami nagkinabuhi na karon sa ulahing mga adlaw, sama sa giingon Niya nga Iyang ipadayag ang Iyang Kaugalingon sa ulahing mga adlaw, sama sa gihimo Niya sa Sodoma sa wala pa miabot ang gisaad nga anak ngadto kang Abraham, bueno, ang harianong binhi ni Abraham nga gipaabot ang harianong Anak, ang mao ra sa gihapon nga butang magakahitabo karon. Ug kung tan-awon bisan ang mga lokasyon, ang panahon, ang mga ngalan, ug ang tanan hingpit gayud nga nakaposisyon na, Amahan. Tabangi kami, nangamuyo kami, sa Ngalan ni Jesus Cristo. Amen.

<sup>221</sup> Karon hangyoon ko kamo nga mag-ampo, ang matag usa kaninyo. Unsa mang butang nga sayup, dad-a ninyo kini ngadto Kaniya. Karon Siya ang Labaw’ng Saserdote.

<sup>222</sup> Tuod, pila kabuok nga mga ministro ang ania sa bilding karon, ipataas ang inyong mga kamot, kung asa man kamo? Siguro mga traynta o kuwarenta. Karon pila sa inyo ang nahibalo niini, nga ang Basahon sa Mga Hebreohanon, sa Bag-ong Tugon, nagasulti kanato nga mismo karon “si Jesus Cristo mao ang Labaw’ng Saserdote nga mahimong matandog sa pagbati sa atong mga kaluyahon”? Mahimo ba nga ipataas n’yo ang inyong mga kamot ug moingon, “Kabalo ko nga mao kana ang Kamatuoran. Mao kana ang ginasulti sa Biblia”? Husto kana. Sige.

<sup>223</sup> Karon kung Siya ang Labaw’ng Saserdote, Siya mao ra sa gihapon kagahapon, karon, ug sa kahangturan. Nga kung hikapon ninyo Siya karong gabhiona, mobuhat Siya sama sa gibuhat Niya kaniadto. Husto ba kana? [Nagaingon ang kongregasyon, “Amen.”—Ed.] Sama sa gibuhat Niya kagahapon!

<sup>224</sup> Bueno, sa dihang nahikap niadtong babaye ang Iyang bisti. Ingnon ninyo, “Oh, kung mabuhat ko lang unta!” Ang imong pagtoo mao’y mohikap niini. Sa pisikal, wala Niya mabati. Ang pagtoo kadto sa babaye, ang mihikap sa bisti. Ang inyong pagtoo ang makahikap Kaniya karon. Nagatoo ba kamo niana?

<sup>225</sup> Mao nga kung maipadayag ang Pulong sa Dios, ipadayag Niya ang mao rang butang ug ipakita ang mao rang butang. Nagatoo ba kamo niana sa tibuok ninyong kasingkasing? [Nagaingon ang kongregasyon, “Amen.”—Ed.] Sige, karon inyo lamang Siya saligan, toohan Siya. Ayaw pagduhaduha. Kondili tomoo kamo sa Dios, nga Iya kining buhaton. Kaninyo *nining* dapita, mag-ampo lamang ug motoo sa tibuok ninyong kasingkasing, dayon kaninyo pud *nining* dapita. Ug kung itugot kini sa Dios ngadto sa usa o duha ka tawo nga kaila n’yo, nga kini wala gyu’y sayup, pila sa inyo kung ingon niana ang motoo nga naila nato ang Iyang Presensiya? [“Amen.”] Kung ingon-



ana mao lang kana ang gikinahanglan. Mao lang gyud kana ang gikinahanglan.

226 Ang gining nga nagalingkod dinha, nga nagatan-aw kanako, nagaantus siya sa sakit sa kasingkasing. Nagatoo ka ba nga pagaayohon sa Dios kanang kasingkasing, himoon kang ayo na? Aduna ka og sakit sa kasingkasing. Kung husto kana, ipataas ang imong kamot. Estranghero ba ako sa imo, nga dili kita magkaila? Pero tinuod kana, sige, ikaw, gining, ubanong babaye nga naglingkod dinha. Sige.

227 Ang gining nga naka-berde, gipataas mo ang imong kamot dinha, nga ikaw—ikaw . . . Ang sakit nimo arthritis. Nagatoo ka ba nga pagaayohon ka sa Dios, nianang arthritis? Kung husto kana, ipataas ang imong kamot. Kita n'yo? Sige. Kita n'yo? Nahitabo lang sa dihang gipataas. . . . Karon may kung unsang Butang nga mikunsad sa imo, dili ba? Kita n'yo, kanang Kahayag. Pili na ang nakakita niadtong litrato sa Kahayag? Anaa Kini karon sa ibabaw, ibabaw mismo sa maong babaye. Sa kalit na lang miabot kanimo ang kalomo nga pagbati. Mao kana ang nagpahinungdan niana, kita n'yo. Gipanalanginan ka Dios, giayo ka na, ayo ka na. Nagatoo ba ka niana?

228 Nagatoo ka ba nga nasayod Siya kung unsa ang imong problema? Siya lamang ang makaayo kanimo. Usa kini ka maitum nga anino, sakit nga patol. Kung husto kini, ipataas ang imong kamot, batan-ong gining. Nausab ang gihunahuna mo kay sa nahunahuna mo kaganina, dili ba? Nakita mo na sa dihang gihunong ko kadtong pagtawag, unsay nagpahinungdan niadto? Para kadto kanimo, para kanimo. Karon kung magatoo ka lamang sa tibuok mong kasingkasing, ang pag-atake magabiya na sa imo. Dawaton mo ba kini ug toohan kini sa tibuok mong kasingkasing? Ang Dios magapanalangin kanimo. Lakaw na, tohi kini.

229 Kining gining nga nagalingkod mismo dinhi, nagaantus sa sakit sa tiyan, nagatoo ka ba nga ayohon ka sa Dios? Mismo dinha sa tumoy, nagatoo ka ba nga ayohon ka sa Dios, himoon kang ayo na sa imong sakit sa tiyan? Nagatoo ka ba, dawaton mo ba kini? Sige. Ang Dios magapanalangin kanimo.

230 Dili gyud ako kaila niining babaye, wala ko kaila sa iya. Babaye lang siya nga nagalingkod dinha, pero Dios ang nakaila. Nagatoo ba kamo sa tibuok n'yong kasingkasing karon? [Nagaingon ang kongregasyon, "Amen."—Ed.] Sige, magtoo lamang.

231 Ang gining nga nagalingkod mismo dinhi sa tumoy, nagaantus sa sakit sa apdo. May bato sa apdo, atay, ginapa-problema ka niini. Kung husto kana, ipataas ang imong kamot; dili kita magkaila, husto kana. Kita n'yo?

232 Usa ka gining nga naglingkod mismo sunod nimo, nag-antus pud, siya. Nakita n'yo ba kini, dili ba ninyo makita kanang

Kahayag nga anaa sa ibabaw nianang babaye? Ang gining may sakit sa kidney. Husto kana. Aduna siya og uremic poisoning sa iyang mga kidney. Kung husto kana, ipataas ang imong kamot. Ang gining pud nga naghawid sa imo karon, nag-antus pud siya sa—sa sakit nga nerbiyos. Pareho kamong dili ko kaila, dili kamo taga-dinhi. Husto kana, dili ba? Taga-Iowa kamo. Gikan kamo sa siyudad nga Des Moines. Husto gyud kana, dili ba? Nagatoo ka ba nga mahimong isulti sa Dios kanako kung unsa ang imong ngalan, sama sa gibuhat Niya kang Pedro? Kung motoo ka lang sa tibuok mong kasingkasing! Ang imong ngalan si Mrs. Wolff. Kung husto kana, ipataas ang imong kamot. Sige, pauli og giayo ka na karon, si Jesus Cristo ang nagaayo kanimo.

<sup>233</sup> Inyo na bang naila ang Iyang Presensiya, nga nahibalo nga ania gayud Siya? Kung ingon niana mahimo ba ninyong ipandong ang inyong mga kamot sa usa'g usa karon, samtang ang Balaang Espiritu anaa sa inyo. Ang Balaang Espiritu kana nga anaa sa inyo. Karon ang matag usa sa inyo mamaayo karon kung toohan lamang ninyo kini. Nagatoo ba kamo niini sa tibuok ninyong kasingkasing? [Nagaingon ang kongregasyon, "Amen."—Ed.]

<sup>234</sup> Langitnong Amahan, wala na'y butang nga nahabilin karon gawas sa pagtoo. Among gihinginlan karon ang tanang gahum sa kangitngit. Kung ang rebaybal, sama sa giingon ko na sa sinugdanan, pagmoabot na ang balud nganha sa tubig para tuyok-tuyokon kini, aron—aron—aron banlason palayo ang tanang dili-pagtoo; karon samtang ang Espiritu Santo nagatuyok-tuyok nganhi sa mga tawo karon, hinaut ang tanan nga dili-pagtoo maanod palayo, ug hinaut nga ang gahum sa Dios nga Makagagahum-sa-tanan hatagan na og kagawasan ang matag nanag-antus niining gabhiona.

<sup>235</sup> Gihinginlan nako ang yawa. Satanas, ikaw wala na'y lain kondili usa ka panghulga lamang, ug nabuko ka na dinhi taliwala sa mga tawo, pinaagi sa Makasulatnong mga ebidensya sa buhing nabanhaw'ng Jesus. Gimandoan ko ikaw, pinaagi sa buhing Dios, lumayas ka sa niining mga tawo ug biyaan sila, para sa kahimayaan sa Dios.

<sup>236</sup> Ang tanan nga nakadawat sa ilang pag-ayo, panindog kamo karon ug moingon, "Nagatoo ako. Bisan pa kung unsay mahitabo, unsa pa ka dugay kini, nasayod gyud ako nga mamaayo ako. Ginadawat ko kini, uban sa tibuok kong kasingkasing."

<sup>237</sup> Ipataas ang inyong mga kamot karon. "Salamat, Ginoo." Dayega ninyo ang Ginoo. Husto kana, dayega ninyo Siya. Karon ipataas n'yo lang ang inyong mga kamot ug dayega Siya tungod sa inyong pag-ayo, sama sa ginabuhat ninyo sa inyong mga simbahan. Igsoong. . .



*ANG PRESENSIYA SA DIOS NGA WALA MAILA* CEB64-0618  
(The Presence Of God Unrecognized)

Kining Mensahe ni Igsoong William Marrion Branham, una giwali sa Ingles niadtong Huwebes sa gabii, Hunyo 18, 1964, didto sa Municipal Auditorium sa Topeka, Kansas, U.S.A, gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2021 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)